



玄洲集禮

詔制表啓序
上樑文
致語

帖書
教書
箋

~16
2400
3



和
2400
5-3

玄洲儂集卷之三目錄

詔制表

扞孤丞相亮詔

高宗賜傅說制

封竹夫人制

王嬙請勿嫁單于表

啓

上巡相求四書啓

代乞改葬亡母啓

代人乞縣啓

上長溪啓

謝右台遣醫啓

序

龜鶴亭序

保晚亭序

拱北樓序

四墓堂序

石泉亭序

凌虛亭序

梅鶴軒序

三湖亭序

鳳下樓序

聽溪堂序

淮南序

贈金秀才序

月沙詩板後

送李尚古赴日本序

送正郎兄赴京序

贈洪樂夫赴京序

贈吳肅羽赴燕序

送洪景望赴京序

送韓仲浣赴京序

送東岳赴潭陽序

送鄭中立序

贈任茂叔序

再答茂叔小序

悼慎佐郎序

哀石洲序

乞畫海嵩尉小序

上樑文

蜃樓上樑文

淮陽鄉校上樑文

月巖祠宇上樑文

鳳笙精舍上樑文

致語

周穆王瑤池致語

織女別牽牛致語

織女別張騫致語

毛都督前領相帖

毛都督前李尚吉帖

教批答

教忠清監司書

教黃海監司書

教元裕男書

教閔汝儉書

教洪瑞鳳書

教柳舜翼書

教許禰書

右議政不允批答

箋

館學生請從祀箋

代賀上尊號箋

代賀誕日箋

代賀登極箋

代賀中殿箋

併儷續集

拜韓信大將制

武平一謝綵花表

姚馥謝酒泉太守表

范質謝平章事表

秦羣臣賀平六國表

歐陽脩進唐史表

臨鏡堂序

霽月亭序

伴鷗亭序

月波亭序

追送九畹序

贈鶴谷序

送李子剛序

走晦吳肅羽序

答李司書乞衣序

除夜走筆序

代薛道人化緣疏

大妃殿賀尊號箋

正朝百官賀箋

金僉知祠上梁文

完平賜几杖教

謝毛都督帖

玄洲集卷之三目錄

玄洲集卷之十

門人慎天翊 攷

併儷

合七十六首

儷集

詔一首

擬托孤丞相亮詔

朕素乏撥反之才徒切恢復之志干戈未定河水清
 其幾時歲月如流創業止於今日頃緣失左右手奚
 暇保唇齒形社稷之安危在茲雖欲自重桃園之香
 火未泯誓不獨生維成敗在天縱免白登之急伊死
 生有命莫返蒼梧之巡肆將末音累我良弼惟卿軼
 伊呂而無愧比管樂則過謙今天下三分是誰之力



使海內一統會有其辰况嗣子幼冲國家公器可輔
則可輔難容父子之私與賢則與賢無拘君臣之義
惟其才十倍於彼是以托六尺之孤嗚呼朕不再言
汝無復讓憑茲玉几撫孤臣而吞聲乘彼白雲拜高
皇而何語 彼一作丕

制二首

擬殷高宗賜傅說用汝作霖雨制

國如無賢君出治而罔濟歲或有旱物將茁而必枯
以物比民視汝猶雨惟爾志介于石躬築于巖若將
終身體雖勞於服役如有用我心豈忘於斯人道將

復興賢固不乏是用虛位以俟久無樂乎為君吉夢
維何宛其人之如玉况世澤之五斬甚祖早之七年
德寡才難無喬木世臣之可倚土焦魚爛非勺波斗
水之能沾若苗之枯何草不萎故君子細民之懷澤
劇西疇南畝之望雲肆拔擢而無疑冀涵活其已涸
嗚呼霈然誰禦惟汝作霖天無見龍萬物何以得遂
我有良弼四海庶幾其蘇

封竹夫人制

緣衣黃裳久失壺位之正丹書紫誥盍舉封秩之儀
寔褒貞姿俾輝簡策惟爾以渭川裔有孤竹風勁直

之操未嘗忘於坐臥清苦之節豈徒爽其心神唯其
外直中通所以體堅色淨置諸左右非特股肱之良
近之床褥斗覺炎蒸之豁秉妾婦之道絕妬忌之心
燕寢清香幾怕秋風之起龍樓華簾恒願夏日之長
是用秦時齋廬不御嬪而御汝明堂朝列莫倚相而
倚卿到老相依賴此君耳論功定次有婦人焉汝惟
不言朕嘉乃績茲加亞少君之爵使如李夫人之稱
嗚呼名以嘉名笑有爲笑功旣成矣縱欲退其何難
我且召之在明年之此日

表一首

擬漢王嬙請勿嫁單于表

天子有命敢緩萬里之行匹婦含冤願得一言而死
豈莊姜之訴日同庶女之呼天欽惟臣妾萬方鞭撻
四裔使海內鰥寡孤獨各遂其生舉天下草木昆蟲
亦知所感至如薄命之賤質亦許待罪於下陳蛾眉
雖不讓人敢望顏色之賜畜物徒知戀主猶以寵渥
爲偏頃緣廟謨之主和以致畫工之逞詐金多少而
妍醜是誠何心天咫尺而欺謾孰不可忍無面目之
可顯寧自列於三千有天鑑之孔昭肆不憚其一二
是所謂畫不如也夫孰曰像惟肖乎若果名實之懸

殊豈宜去留之失擇况今安社之計必在婦人之身
終古平胡之功不借英雄之手雖百骸歸于土嗟所
願在域中知一死賢於生亦不敢負陛下當承聖意
所不辭於犬羊苟利邦家尚可行於蠻貊第惟吐實
之哀籲諒非丐免之飾辭若論妍蚩當世之無益何
限以言威武比屋之壯士不窮盍執取捨之兩端叅
究輕重之一義當時紫極猶望袞龍之光今日紅顏
不及寒鴉之色關河此去路不極於風沙環珮他年
竟倘歸於月殿巖廊妙策雖出得筭之良兒女私情
亦有可憐之然伏望重編舊籍再降新綸欲壯威服

之猷當擇能戰之將若順舅甥之請亟送可遣之人
則分踰空閨心井枯死驕戎自戢長閑戊巳之營寬
氣致和益高乙丙之枕謹當眉還山色面更春風花
暖金樓天歌雖阻於倚瑟秋深繡幕宮譜庶和以援
琴

啓 五首

上巡相求四書啓

古之學必有師方思負笈而進今其書不可見敢乞
藏壁之餘求則得之固所願也竊惟四書之於士譬
如五穀之於人過化存神之功著於論語一部難疑

答問之說作爲孟子七篇明德新民茲乃大人之初
學率性修道實是中和之極功三綱由此而得明百
世以竦而不惑道所存者文不在乎伏念以下愚才
昧上達學人言馬服君子徒能讀父書自效龍伯高
賢唯懷刻鵠志少事文墨何用幻棘頭形童習白紛
終歸正墻面立然不學則將落庶有志者竟成頃緣
東爨之再西遽致南師之三北彼父母妻子之血尚
且波途伊詩書禮樂之灰任其掃地三萬軸挿架已
矣鄴侯家藏數千卷賜書火于善化里第後生緣何
新得前輩只守舊聞九仞難期於學山三餘辜負於

隣壁好古生苦晚不復夢中國聖人借書常送遲頻
見嗷北方學者幸茲聖經賢傳錄諸通邑大都苟存
志乎斯文捨此何取嗟不可以無學有如是夫人十
而詎能乎千書多而難致者四家貧而學不富紙貴
而價益高然斯書皆實學也亦固宜公傳道之矧我
閣下以繼往開來之心當觀風察俗之任周情孔思
纂遺篇以爲己能徃行前言勉後學猶恐不及斯道
賴以彰吾儒蔚然興河陽幕參謀致有溫處士衡湘
南經術宜師柳先生此可謂知所依歸非敢日期於
必得伏望謂寒土無所告謂聖書非所私以其盈箱

填此竭望使之畢其業用能責其成則以陳編而易腐儒縱今日之無益失四書而得一士或他時之有期養雞鳴客有三千未曉而死路或脫買馬骨金且五百不暮而生至可希謹當有虛往實歸之懽無孤陋弱喪之嘆刺股遂業縱未雪鰥面之羞奉履傳經詎敢忘黃石之教

代人上巡相乞改葬亡母之需啓

天有終地有窮長懷罔極之痛生無養死無葬寧辭不孝之誅孰令聽之可以言矣伏念家不肖子國無用民小遭愍凶樹欲靜而風不止終鮮兄弟人皆有

而我獨無三年後免於懷誰取寡婦之子十歲前未有學每勗先君之思舐犢慈深髮每截於堂上哺烏誠淺橋還乏於懷中顧無一卷之師幸有三遷之訓方且朝耕夜讀庶幾入孝出恭未央弄袖之雛忽驚生郊之馬流離奔竄父子君臣詭靖康年口先嗚咽聞汴州亂足幾彷徨母曰嗟予子今爾今失王之處臣各爲其主耳胡忍以賊而遺然政身不可許人故終縲未請係頸爰東北西南之靡托故險阻艱難之備嘗奉潘岳輿膽消豺虎之窟負子路米足繭荒山之道出萬死不顧一生得全江革之母踰千里以糊

十口行携工部之妻庶擬相養以生終始事親之道
豈料夫未列子輿之鼎經叩王祥之冰旣溽暑沍寒
之餘爍其肌血又恒飢久渴之極悴其腎腸哀哀昊
天夢忽成於兩豎奄奄氣息藥無效於雙龍如可代
某之身詎抱終天之痛嗚呼纍然身上驚非老菜之
衣裳邈矣江南遠違先人之丘墓唯將數條藤束竟
成三尺旅墳反藟裡掩之誠可悲矣斂手足形則獨
無校乎死不可復生永負歸養之志喪固所自盡徒
切慎終之誠遇一哀而脫駭天縱之聖見三喪而賙
麥世無其人格于天神孟姬之祥金辭穴班諸兄弟

子柳之賻布違囊無使土親膚亦已難矣願歸骨山
足何可得乎有顏色哭泣之哀無衣衾棺槨之美傷
哉貧也道之窮歟疇不執親之喪鮮聞於我乎殯口
不漿者七日淚可徹於三泉哀哉不忍言天乎曷有
極考生事以禮之訓豈曰無憾於心蓋死欲速朽之
言只是有爲而發初不料行乞于市竟未免填死於
溝回首鄉關滿眼兵火縱竟氣無所不往伊湖山邈
焉難踰誰樹松三年而歸嗟未封四尺而葬嗚呼離
家問路薦香火無所可憑蒙袂操瓢雖饘粥亦難繼
嚙人間何世苟全草土餘生歲月如流奄見霜露三

變拱木鬱鬱哀旅嵬之靡依宿草芊芊痛新阡之誰
護反葬故山之無日戴履天地之何心嗚呼余尚何
歸亂靡有定當壬辰之初亂既失母於飢寒逮丁酉
之再驚又哭妻於鋒刃顧瞻四方而靡聘至今十年
其猶初以聞於人猶恐絕氣雖頑且蠢何忍自居非
不知早自決焉然所願良有以也是用輒復苟活猶
幸得生不念瑣力於移山只思合祔於先壠况風土
不並以北而江水雖折必東此去故山之阿不至千
有餘里倘資糧需之外加給一車二牛奚久於齊過
臻于衛是所謂窮欲達意亦可恕死不擇音涕隨言

而交零口不食而自餉苟無伯樂孰哀蓋車之鳴不
有仲尼應休泰山之哭所恃者時與勢耳以至於今
之久焉幸遇相公閣下孝友出天仁愛及物幼吾幼
老吾老民是吾身樂人樂憂人憂心置人腹一夫不
獲卽若已推凡民有喪莫不匍匐乃使冠婚喪祭皆
得其時以至士農工商各有所業故生老病死之鬼
得歛殯葬埋之宜伏望推慈祥愷悌之誠激哀憐惻
怛之意充飢救死奚必八珍味之具拯溺濟焚只在
一舉手之頃謂丈夫不能食乞憐於吾謂窮人無所
歸責在於我容請車之惑特賻牛馬之資遵發倉之

仁兼周道傍之費卽令餘骸返土旅櫬歸山未辭異鄉之風烟得穿故丘之松楸則生死榮感母子幽明不惟白首孤意飲泣荒原之夜雨抑亦黃馘餘喘隕絕雍露之曉歌謹當生解疏屬之懸死合中行之目將粉骸擢髮而謝奚但破腦而刳心蓋天地父母之心非止生死而肉骨

代人乞縣啓

為梁慶遇作

雖有良朋孰肯傾耳而聽豈無膏沐欲為悅已者容持是道歸以此言進伏念睢不中墨朽難承雕賴先人之緒餘小子何迷嗟雕垂而篆刻壯夫不爲人或

有言可以出而仕矣吾斯未信方且學而習之頃值科日之乏才妄擬穿葉之有藝彈冠而起濯纓而歌徒能讀父書知獨學之已陋盍各言爾志怪許身之何愚和南風之薰兮肯落人後雖北方之學者莫敢我先纔歌吟之沿途已詔板之入等桃花滿浪誰謂三級之高桂樹飄香未見九天之遠趁南園之蝴蝶草與袍而俱青獻北堂之罔陵柳共蓋而一色無倚間之悵望有下機之欣迎幸年歲之未衰謂青紫其可拾文憎命達道被鬼怪待詔金馬門時值槍攘校讎天祿閣分實兢惶近帝座尺五之天齋太常二百

之日三年博士一官誤人每擬六級之陞或榮一縣
之養乍返命以接伴旋謝恩於郵官顧歸養之無期
將曠官則有責王孫芳草長恨一年二年郵吏行裝
空勞十里五里塵埃隨處自速衆謗之熏歲月如流
羸得兩鬢之雪愈苦陟岵之怨難堪望雲之思茲待
擅棄之誅俄獲還除之寵新知落落歎庾信之平生
舊業悠悠返楊雄之破宅暫同隨陽之鴈還爲下喬
之鷲奉慈顏於南州望美人於北闕長安近於白日
有時舉頭蜀道難於青天無處著足甘潛伏而無悔
復駕言今焉求然而母老在堂身貧且病囊乏子路

之米筐絕王祥之魚采山釣水之供難給甘旨冬綿
夏葛之御詎適寒溫誰迴東海之波已迫西山之日
母曰嗟予子苟得養以專城上以奉君親可移家而
爲國誰無父母聞者莫不唏噓皆有弟兄惻然相與
勸勉蓋念所貴乎人者豈曰駒犢之從何取於斯哉
尚有烏鳥之哺以吳起啣臂之志爲相如題柱之盟
是處青山非乏雲松之興他年白髮其如風樹之悲
茲離王粲之家乃赴陸機之洛苟三釜之莫慰不及
黃泉倘五馬之未還有如白水雖然朝無親黨勢絕
攀援逢時異宜豈是馮唐之老戒門相絕皆疑王適

之狂聞諸公禮賢之誠不在荒野惟相國愛才之意
足容鄙夫輒用書干敢以情訴仰惟相國閣下丹心
衛國黑頭提句祥雲慶星直與日月而炳深林鉅谷
屹然龍虎之姿富貴果然逼身文章乃其餘事士爭
欲出門下人莫敢窺涯埃識韓荆州曾是望外如歐
陽子何處得來山公甄拔人才安石起來廊廟邦須
柱石國倚著龜無不抵掌而前孰肯納履而去文昌
迥耀於八座天子猶誦子虛位望選揜於三台走卒
皆知君實故如生之羈旅亦得知其依歸所以長吁
短嘆而乞哀大聲疾呼以求救然因鬼見帝之無路

故炊沙鑊冰以爲工曲逕旁蹊豈無可干於天府賈
肩諂笑爭奈病甚於夏畦三上書而自銜先儒雖或
非之一投足而不拯君子胡可忍也况如某者悶嘿
竢罪七載有餘起廢復除一邑而足古無位則相吊
今失所而誰憐才不直於一錢文何用於八斗伏望
以賢賢志推老老仁謂曾參之做官雖出於養知毛
義之奉檄不在於他特擬一命之官俾遂全家之望
則流惠於不費之地收功於難報之天使母子榮皆
我公賜當生唯其命死無所辭蓋造化生成之恩非
止生死而肉骨將粉骸擢髮而謝奚但破腦而剗心

上長溪啓

黃芑川

負笈千里方有志於斯文樞衣一堂幸獲私於夫子
步竊效於大禹色先恟於小巫仰惟德居才先實包
名外珠冠霞佩早踏蓬島之萬重彩筆金牋久列瀛
洲之十八講典墳於經幄頻玉色之生春播絳綸於
油幢有悍卒之墮淚歷階二品一節兩朝屬當辨誣
之難人乃謂有臣而可使於是上崢山而踰深谷何
懼驅馳朝受命而夕飲冰載勞跋涉丹心銜命皓首
陳辭冠蓋相望於途徒勤吁闔之請水漿無入於口
終感碎首之忱豁重雲之白日誠意九天開大夜於

青丘人倫萬古陽春及於草木非但舉國之休風雨
淒於園陵應有在天之格畫出麒麟之第一果然九
尺之長誓指帶礪之無窮豈直十世之宥所以與國
家休戚固宜係宗社安危逮乎島夷憑陵王師顛覆
際金輿之播越承玉音之丁寧懼是多男哀兩兒之
尚幼時乎寡助唯二臣之與同吾何走乎逃矣西土
汝可往矣鬱鬱彼北林存亡危急之秋父子君臣之義
遂乃衝冒兵刃竄幾羞於捧頭奔走飢寒誠每切於
割股寧知不虞之地乃有叵測之徒嗚呼起轂下之
羗胡勢有難及遇舟中之敵國計無奈何怨屯戍而

玄洲集
逞凶異於涇洲之卒忿菜糲而作逆甚於涇源之軍
自王子而迄公遂東縛而遺賊頭雖百折忍作他邦
之臣髮彼兩髦實惟吾君之子肆忘生而捍衛爰被
擒而從容其輕若斯非乏常山之舌所重在此宜全
丞相之軀匿遺孫於山中事雖異於杵臼抱阿斗於
馬上忠豈多於子龍堤上之勢不俱還泛孤舟而赴
死雲長之路有共返阨五關而得生烏忽白於秦庭
雞既鳴於函谷完趙壁而東走終免虎狼之求持漢
節而南歸曾牧牴羊之客全公私之恩義報國家之
君親典屬國以賞功曾所耻者屈讎庭以論罪不亦

冤乎既吹毛而責非又下石者皆是有罪無非天知
神知漢家之待功臣雖不至薄唐朝之責李白胡獨
太深終未暴露其冤竟坐黥黥之典言三至而成虎
羽幾積而沉舟投荒禦魅越千餘里省愆引慝踰一
十岭賴聖衷至公而平故天道周紀則復待罪輦轂
之下于今十年獲覩天日之臨不朝則夕倘得一言
之悟蕩滌可希不待百世之論是非乃定况年德彌
高而彌邵伊毀譽或浮而或沉蓋吾輩未之前聞唯
文章乃其餘事承其風者草化就於德而月將時先
生說二經士欲出於門下以道德伏一世牛豈全於

玄洲集
眼中伏念學不通方愚未聞道猶食有口寧辭飯囊
之譏供世無言端合木偶之比少孤而服三遷之訓
長成而乏一卷之師聖路長堙寥寥數百餘載流光
莫住堂堂四十九年谷豹成斑恨乏南山之霧轍鮒
無沫思添東海之波幸擇里而依仁喜出谷而遷木
頃者獲賜顏色得炙音塵乘學海之波瀾覺吾道之
坦蕩偉確論直辯折鬼神而無疑若鉅谷深林做龍
虎之不測遂驚井而望海乃嘆東而效西圯下之師
黃公雖曰幸矣揭陽之誨趙德亦非偶然伏望謂傳
業無私謂孺子可教問駑駘之蹉跎俾副希驥之誠

血螟蛉之喘喙時賜類我之祝則石可攻玉沙或爲
珠追逐參翺翔誇距奮於文囿磨研造閫奧掉鞅鞞
於騷壇謹當趨跼於函丈之間奉袂於几席之下瞻
前顧後雖莫測其形容虛往實歸庶無怠於傳習

乃祖綾城吾父執風流氣節動人聞承家賴有
賢孫子名世爭稱善古文自愧疎慵無肖似休
將文字謬推尊唯應寂寞楊雄宅問字時來可
與論
右長溪答詩

謝左台遣醫啓

尹昉

滅耳亡聰寧懷應物之念披聾獲聽實賴遣醫之仁

枯枝再花感草重結伏念少孤鶩鈍多病龍鍾離父母之邦一身千里值壬丁之亂萬死獨全飢寒困頓之餘神血中耗疾病死生之際形氣外凋韓吏部之牙未老而先落潘安仁之髮方壯而已秋中歲之罹疾也有由上年之不死者亦幸自來茲邑轉增舊病向金剛萬二千峰縱青眼之乍暖距鐵嶺四十餘里厭白頭之遙寒旣風土不并以南伊沔寒實倍于北饕風虐雪無夏無冬厚被重裘不日不月衰加杜老却從前月而聾疾異鄒賢難期今日之愈間聞城市變爲寂寞之濱意鬼精神歸於恍惚之域搖身對案

識稚子之吟詩蹙頰牽裾知老妻之問疾疾雷擊乖龍之柱等看布鼓逢楫駭浪沸浴日之淵比視止水潛動人間底處聒雙鳥之啾啾雲外如今息九苞之歲噉吳江八月濤馬騁而非壯晉地三更風鶴逼而不驚雞唱秦京想朝班於五點猿啼楚峽缺秋淚於三聲玉笛正弄龍無滄海之珠絳唇徒開天有白雲之渴萬吹歸於過密百嚼呈其寂寥自悼蒲柳之殘骸甘爲聖世之棄物誰意相國之憐問乃令太醫而診鍼青囊未探已驚和附之手紫訣纔試便泣膏肓之神疏三百六十之經逐新邪於頭部濟水火金木

之氣授舊聰於腎門有語卽通三旬之充耳何去無
聲不入二精之復位如初聞雀噪於簷端欲忘三月
之肉味辨蟻鬪於床下肯數衆蚊之雷音自少及今
未滿三萬餘日由聾得聰方覺一千百功披雲霧而
覩青天未足論快生羽翰而登紫府豈獨稱仙非老
翁無以致醫非鍼法無以開聽俾癢痼得齒於人皆
我公推已之義敢不承風鼎耳聞道台階蘇殘下邑
雖昧眼前之瘡醫國他年底備籠中之藥

序 二十七首

龜鶴亭序

國天以東郡嶺之左何流不駛凡峙皆紆千峰北來
輸白頭之爽氣萬水東委挹青丘之靈氛天星之所
包纏地勢之所回互謂有神仙之境果見龜鶴之亭
惟神是庥實天所作雙巒對起劃成闔虎之蹲一川
中分活作行龍之蜿何年禹斧揮戍削之烟鬟當日
秦鞭失斬巖之山骨松巖落影半浸荷花之中潭舟
沂虛倒聽楓葉之下湍激則奔雷沸軸淵潭則纖纒
息文月舒而瑤臺空春濃而錦屏動物無與競魚亦
相忘童男可憐海上本無蓬島漁舟何處人間更有
桃源苟非起氛而淑郵寧能致身於福地主人高才

玄洲集
拔俗強顏隨人素履黃冠結幽期於南麓紅塵白眼
辭薄遊於東華富貴如浮雲乍回南柯之夢朝野小
暇日休上北闕之書然鄉黨之坐深余棲遲之興淺
人期鍾鼎於廊廟我以泉石爲膏肓茲焉得地之靈
豈非素有仙分登而盡山之趣果然深覲天機旣翬
且夷乃輪而與曾雲遮而霧擁任山靈之馮訶忽鳥
跂而翬飛見林亭之清絕乃知千古江山之勝終爲
一人臺榭之娛觀其兩龜相趺逶馳逶迤之勢一鶴
孤聳迥走崔嵬之形足以望國之氛肯學掩魯之大
寧作仙人之駕不願乘衛之軒碧流經中况如玄兆

之拆白雲在上恰似縞衣之翔此所以卜居潛藏離
羣遐舉志食苔而彌潔迹巢蓮而愈貞出烟霞之萬
重何如鏤翮於籠裡藏巾笥以十襲孰若曳尾於塗
中運氣無營自得千年之老步虛有羽終遂萬里之
志公固樂此二重山亦號以兩美扁斯額者著其志
歟主人於是淡然無機淵乎有適遇幽貞之卦誦頌
俱之詩望小白之山雲新詩未就坐溪心之臺石宿
醉初醒絃歌夜調響動溪女之室簾幕朝捲彩徹潛
蛟之宮俯一帶之琉璃倚千尺之琬琰人居天上犬
吠雲中耳與目營神入道寂微風乍回以欺鏡小雨

時過以粧圖山入水而與青鷺起沙而分白籠林淺
錦朝記水村之烟點渚疎星暝識漁窻之火尋花問
柳幾邀元戎之出垆仰槐者松時與野老而爭席霜
侵敗葦遠眺侯鴈之驚雪汨水灘暗聽夜鴨之散尋
一壑之榮悴占四時之炎涼以雲烟山水之間爲道
遙倘佯之具仙者隱者古徒聞而未逢亭哉人哉今
絕無而僅有若余者家徒立壁地無起臺生無所成
垂種種之黃髮去將焉適者處處之青山屬顛沛之
流離任東西又南北他年築社慕還山之樂天今日
登樓作離家之王粲如或便風一日帆通滕閣之遙

山陰暮春躬造蘭亭之會則茂林脩竹之勝豈獨媚
於右軍落霞孤鶩之吟不多讓於王勃序而止耳詩
何係焉

保晚亭序

為月滋相國固請作

楊湖東麓麻浦西枝幽非野堂迥異江閣山形之所
運迤水勢之所紆餘樹高棟於林阿明霞破錦抗聳
梁於巖表杳靄穿紋楹絕流丹呈至素而不野斫無
刻翠晦繁文而愈鮮非侈非崇寔君子之攸宇不高
不廣乃神明之所扶而况處兼山野之中占盡江湖
之大爲農爲圃友樊須而隣邵平以釣以漁懷任公

而憶呂望層霞蔚而莫散花嶼界銀浦之心長雪迤
而不融瓊沙封碧洲之背新霞吐皎蒼留南浦之雲
反照收紅簾捲西山之雨劈鳧島之遠霧雲席乘潮
帶鷺渚之橫嵐風檣透漢蒼蘚翠角高起老龍之頭
粵谷蓮峰幾遍仙人之脚繁星點於遙夜隨處漁燈
列樹直於平蕪無邊買舶牢落江村十里微茫烟水
幾重青蕪蘩春波共青白鷺起晚沙分白三江萬古
一畝孤亭然而庭戶纔成中窄主饋之室墻垣未築
外無旋馬之門歸來莫謂苦遲亭號有此保晚矧我
相公閣下齊家治國緯地經天天星海仙遊戲斯文

之表石麟雲鳳浮沉流俗之中蜚英騁藝餘四十年
翥要騫清難一二數握銓衡而掄揀官無積薪之歎
秉文樞而薰陶士有攻玉之慶發藻酬唱幾天喜之
春融團辭辨誣曾帝疑之冰釋楊經略之誠服豈無
意焉熊御史之神交良有以也方期道以文衛非但
國由公華頃自燕路而纔還病違鶴班之共請聖明
如日事雖蹇而身伸孤忠若葵恩則大而謗速肆躡
東山之舄出自國門乃跨西湖之驢入此室處几杖
琴瑟携成衰境生涯藥物圖書來作幽人契濶明窓
迥啓蓄朱夏之清颺奕榭排虛藏碧海之明月禽魚

山水之外更無所求諷詠優游之餘聊以卒歲樓遲
白首休上北闕之書唱晚滄波驚斷南柯之夢矧又
簣唱箎和庭兼二難之榮玉應金春人稱三秀之挺
侵情觸眼無非供老之資動容發音皆是却衰之具
茲足保其晚景知額號之蚤扁某新進小生故人稚
弟昧燕石而自銜徒懷三別之悲護鴛鴦而垂憐幸
增一顧之價雖所願學孔然何敢望回茲者閣下不
以雕篆之才爲無所取乃謂月露之句或有可觀申
命之勤固請不懈是用輒忘陋澁冒布衷懷如此荒
詞豈日序之云也他時風景請且爲公賦之

拱北樓序

路走三藩無出湖西之勝江橫一帶有此拱北之樓
雉落波心魚搖檻影排霄漢而起棟日月照森屈虹
霓以爲門風雲闔闢扼全慶之吭環繞都畿跨湖嶺
之腰委輸華漢形猶衆星之拱勢敵一夫之關西垌
相公之肇開豈無料度北門鎖鑰以取譬良有由然
屬茲九畹之提鈴庸 重新其圯桷唱和同響前後
一規何名 之宏敞占爽境之壇衍活畫難分其真
假飛仙孰昧其有無惟彼去馬來牛掠平津而填噎
殘霞斷雨粧極浦而微茫嶺月舒輪漾金波以動色

巖花倒影開繡鏡而濃香鷺起鴻飛爭遵蘆秋之渚
漁歌牧笛競答杜蘅之洲春雲共白沙無邊錦水與
青天何極或乃瑤船玉舫復携美人而登桂棹蘭漿
徐待落日而放絃歌迭奏游鱗立於微波鼓吹相喧
老蛟舞於幽壑而况山圍百里草老甄萱之墟花落
千年江深義慈之國三韓忽已丘壠白濟何處樓臺
帝子泣兮綠雲愴古何及長安近於白日昭代方隆
矧余承綸九重按節三路嚴程役役瞻北辰以逾遐
行邁徐徐翫南樓其何夕蘇仙泛舟之後雖著赤壁
之名李白題詩之前已彰黃樓之勝便風引興倘豫

滕閣之筵暇日消憂聊題仲宣之賦

四慕堂序

孝悌忠信

青山在上白水流東村藏一區堂揭四慕乃瞻衡宇
誰謂無家更擇令名是以有譽非丹青輪奐之爲美
非江山形勝之足娛孝莫大於愛親爲子止孝忠可
尚於循國盡已爲忠以交於人無信不立欲事其長
非悌曷恭其爲人之本歟吾必謂之學矣故居閑處
獨之日皆顧名思義之時念在茲釋在茲而無荒生
於斯長於斯以至老所以梅兄竹弟感友愛而敷榮
木奴花王服誠意以華實宜致吉祥之止止不願厦

屋之渠渠如某者行州里哉昧順德也有計未歸巖
壑虛送百年無地可起樓臺難窺數仞倘或行遠自
邇入室升堂則以顏氏之才高尚一善焉惓惓雖曾
參之質魯庶三省而孜孜

石泉亭序

在安東

翠靄蒸嵐遙挹少微之彩竒峰邃壑斜控太白之雄
人傑由其地靈水清所以石瘦雲窻對榭如開列真
之堂綺閣浮楣况結靈屋之宇錦蘚落於斧鑿女媧
餘天玉龍吼其琤琮伶倫遺律霞蒸紫洞景奪三島
之春水明瓊樓光掩十洲之月林泉亦有富貴平地

豈無神仙濱百里之花山偷一片之靈境惟彼瑤池
玄圃周馬踏而非真金闕銀臺秦童望之如夢如或
河源風浪不禁漢槎重乘茂陵桃源肯許漁舟再過
雙鳧便舉孤鶴能飛一區烟霞不惡共作盟主三湘
物色還應知是洞賓

凌虛亭序

虹飛鏡裡帶波華而抗梁鳥跂空中排灝氣而開檻
東西是水上下皆天雖復室異蛟居魚龍富於滄海
人非羽化雞犬近於白雲涵水月之雙清共乾坤以
一碧春粧繡嶼對落花而無邊秋映瓊沙望歸鴻而

未極惟彼五湖之波自在形勝誰專三峽之樓雖高
虛無只少而况攀橋入月曾九萬之無憑御氣乘風
亦旬五之有待曷若隨時啓沃從授簡之大夫暇日
登臨作憑虛之公子顧余何年歸去無地樓臺一颿
之颿未回已違盛宴數句之詞還 空夢滄浪

梅鶴軒序

天葩國艷乃瘦嶺之芳姿皎服玄裳是臨臯之道士
故其冰堤雪岸開寶靨以回春月桂風松引圓吭而
警露然且灞橋之路十里何處清香華表之栖千年
難尋逸翮曷若移根固植聊憑一撮土之中弄影長
鳴自在數畝庭之內未離東郭之隱几已占西湖之
高標雖然伴瘦羽與清枝便是三絕唱佳人以拙句
豈云二難舞鶴三更非爲泣鬼之語落梅一曲如增
過雲之聲

三湖亭序

在交河爲白軒固請作

江山有主風月無邊若非不羽真仙那得無縑活畫
晴川芳草尚何勞於品題二水三山不必論其形勝
第惟重攀月桂飛步青雲三握天衡吹嗟白日滄波
入夢蟄王喬之雙鳧烟棹違秋望張翰之一鴈所以
周子去而忘返松陰轉疎王孫遊而始歸草恨方歇

於焉嘉客孰謂林下無人若將終身更喜樽前有友
然且君民是急魚鳥還輕江上漁翁猶臥西巖之月
窻間道帙旋扇南浦之雲嗚呼今代麒麟雖暫屏於
大樹他年翡翠肯許巢於雕梁佩國安危兼善愈於
獨善處江憂喜三湖勝於五湖

鳳下樓序

在善山

神怪鬼秘留一片之爽丘地放天成開數椽之危檻
是知謝眺指點之後宣城方得令名鄒宰登臨以前
洞庭久無顏色而况洛浦之首尾千里榮光集於上
游白峰之懷抱萬重淑氣浮而右轉多士合爲人傑

羣賢稱其地靈惟其兵火之屢經所以臺榭之一廢
不惟勞使臣之際無庾公翫月之樓至使鄉飲酒之
堂爲宓子彈琴之室是用剪棘開棟後主先賓收拾
物外烟霞粧點空中樓閣形連飛鳳想雲外之九苞
勢控金烏訝日中之三足黃雲亂堆於遙野秋老萬
畦之田紅錦半碎於長林霜酣千樹之粟星垂極浦
影搖海平之沙日照扶桑光動天成之堞世間有他
勝界天下無此孤山明月共清風無邊白雲與青嶂
何極嗚呼今日遙吟難堪枉笏之思他時長笛倘念
倚樓之人風阻子安之船誰序滕王之閣天留永叔

之筆自記醉翁之亭

聽溪堂序

南原房元震三度簡乞故及之

地閭三籟枕幽溪而尋聲心齊萬吹倚大塊而入寂夫以名符地始西南北而有東姓應天文二十八而居四初登國學乍轉幽鷲之春薄出郊畿旋拋傳馬之印居然白首遑遑乎欲奚爲是處青山綽綽然有餘裕三粲交艷雲雨近蛟龍之城雙珠並明光價聳鴻鴈之嶺方丈之面入座此間豈無羽人廣寒之路連郊何處更有月殿是知琤琮滿耳如聆韶護之音清馥爽神勝聒環佩之響余方舍明玉采靜觀觀音

之觀絕聞羣囂堪聽聽天之聽觀音之於觀色誰是得觀聽天之與聽溪俱非失聽

淮南序

桑溟左汨越秋嶺而方西鐵嶽橫峙走關山而直北由其處地極峻所以風土異常冬盡陰崖難舒一元之氣春歸急峽長吹萬里之風丘巒欲飛屋木皆拔山埋谷沒但看積雪層冰燕遊鷲羞何處落花芳草蓬萊羽化非遙逸鶴之驟草澤鶉居載戢痾蠅之翼邊聲動戍角搖五更之星隴怨凝秋笛入三年之月動植以之舍悴人情斷於樂生地近長安劇天下之

窮處寒多朔野怪域中之殊方方生萬物之輝麗中
天之白日佇釋一隅之憾發幽谷之青春

贈金秀才序

粵自終無始有一氣轉爲陰陽方濁圓清二儀分而
宇宙羣於萬物肇九頭之人皇藹然四端隨七竅於
混沌星象昭印奎壁燦天上之文龜龍負圖河洛薦
人間之瑞犧思鉢妙解太古之長繩鳥迹摛竒哭中
夜之舊鬼遂傳千里之恣恣庸開億代之茫茫非唯
出言之精斯乃貫道之器於是刑政賴而不恣禮樂
由其益彰高辛堯舜之巍巍罔不以是神禹湯武之

郁郁咸皆懋茲周情孔思百世以俟而不惑聖祖神
伏三光幾曠而復燦百家之奧旨微詞出幽入眇九
經之要言妙道緯地經天玄老誕莊驅十氏以遊外
哀騷浮左擁諸史而揜前至若秦之欲亡韓呂從而
隱怪漢斯爲盛遷固稱其雄剛五馬遙馳歷江左之
六姓衆蟬亂噪作建安者七人於是尋章摘句之居
多取青如白以爲巧人將失學天未喪文惟江鮑徐
庾之吟雖有歎於風雅然月露風雲之句猶且振其
詞源山岳彌高李杜韓柳之互唱江河難廢王楊盧
賂之相鳴觜距爭誇之幾人逶迤不振者五代逮乎

皇宋涵起人材蔚興周茂叔之襟邊天開霽月程明
道之座上地放春風吾黨斐然成章衆儒相與扶道
爰及伊川而偕作遂至晦翁而大成斯固唱和乎聖
賢于以表裡乎經傳然而盈虛有數識消長之相承
舒慘隨時知盛衰之適代故無往而莫返不有廢則
何昌於是元朝漸昏古月方晦聖人作而品物覩精
氣入而羸穢除大明由是大明中國所以中國滄溟
弇州之作欲追漢唐之隆大復空同之詩擬駕元宋
以上方輩出於海內實賓興於寰中歷遂古而當今
幾雄才而美質况茲大氣之播物不以偏壞而嗇才

爽惟我邦雖僻介于東土欽承天命又環拱乎北辰
三氏出於檀君斯文未闡八條始於箕子吾道其興
乃有崔孤雲之綺詞排四傑於唐葉李相國之大手
軼五百於麗朝稼亭生此牧翁圃隱友其冶老暨乎
山崩虎去霸圖盡於五冠地闢龍飛佳氣歸於三角
揔入路以建國襟帶山河越累代而鞏基禮樂文物
多士共濟非特笙鏞乎六經五賢相望乃能人倫其
百世鍾間氣以挺出存齋浚陶山之源沂宗派而承
流溪老和石潭之韻豪健最於蘇訥偃奇稱以院臯
有若復元之奇才鮮能及者至如石洲之麗藻豈易

得哉文治允浮于中華儒教不讓於前古然今才者而德否實由世遠而人亡嗚呼鳳逝龍歸瞻碧雲而絕響鴻飛鳥過踏白雪而遺蹤哲人其萎誰辨兩童之智大易猶在徒爭九師之門相輕之風未有甚於今日自重之習信難醫乎此時惟彼家家未聞守雌人人自謂得將雖然已識鄒忌之貌不如城北徐公誰將作起之賢錯道關西夫子以併儼名者徒纂梁隋而不知變以章句稱者徒工聲律而不知通魚非緣木可求瑟胡膠柱而鼓一言僅可便欲壓倒諸公片句纔能方將橫駕舉世爾乃尋塵水鏡剔垢之爪

百端索玷荆珉吹毛之喙三尺士衡覆瓿之詆未宜出於平生杜老壓公之譏不當發於抵死噫以非魚知魚之樂不若自魚處有鳥無鳥之間方始得鳥巧拙唯其在我毀譽不如從他是知雌雄等鳥得失如馬唉此向痴而說夢何異與矮而觀場南帝妄尊東隣效色深居井底寧解井外寬閑高坐堂中方知堂下曲直故其謙能受益實宜若虛讓位不害爲陶唐問禮何損於將聖何況滔滔皆是賀賀遂非假令得之不過爲小枝之賤非吾徒也見笑於大方之家奏賦論詩無益於成敗之數窮經力行有補於風化者

多與其棹鞅於文場曷若插埴於聖路若余者學未
聞道文不成章竒法焉正葩焉聲牙焉詰屈焉曾不
用力綺靡者瀏亮者溫潤者清壯者皆非著功活虎
生龍終非朽索可制雕虫篆刻亦豈丈夫所爲滄海
浮空莫施童孩之步咸池落照空催夸父之鞭白石
方治女媧之青天萬古黃河欲障神禹之赤縣九州
三千秋而鳥鳴會有異日九萬里而羊角柰無其風
方且淵龍養珠功未就於尺木谷豹藏霧志猶專於
寸斑今足下壯略雄圖獨步千里騷壇藝苑少年將
軍以岳岳登仙之標有飄飄凌雲之氣瓊霏寶唾隨

紙而五雲玉焰珠光出口而萬丈馬子長之藻思已
湧涉遠之前王仲宣之聲名更增登樓之後猶尚以
我犬馬之齒謂或少先屈其鸞鳳之儀待以長老旣
文采之潘岳才類稱佳更清真之右軍詞筆俱絕况
此肫肫卑讓都是蛇地碩言殆庶幾乎未達止於一
間顧勉疆耳優入在於數年可以與子偕臧不必捨
爾所學越浮靡而踐真實道不遠人造門墻而望室
堂仁惟由已所以後生之可畏庶與先覺者同歸重
違累請之勤敢將一語而贈茲乃暫承簿牒之暇粗
事鈇槩之勞上自盤古以來道德文章之盛下及偏

荒之遠敦淳浮薄之風一爲反已之規一爲救時之
憲無毀致毀晒昭氏之鼓琴見珠疑珠宜末俗之按
劍聊嘯咏而揮洒天地低昂况霹靂而風雲鬼神瑟
縮荒調雖澁但願傾耳而聽明鑑必詳毋宜他眼之
掛

月沙相國詩板後序

蓋月圃移都慶天國之開泰星仙考藝喜人文之益
章是知畫足失盃之詞回紫殿之春色夜闌秉燭之
句入青童之玉聲萬古歸其冥搜六丁疲於下取所
以丁寧附耳勅飛廡與雨師密若無言走陽侯而河

伯於是山移禹鑿瑯石海立於地中石破媧填黃河來
於天上卷舒舒之淮水者浩浩之襄陵日月晦冥乾
坤辟易豈不以變化所極取捨以懸沒楓岳千萬峰
雖有憾於羽客收驪珠四十顆柰無欠於天箱故其
唐昉一去之餘便移斗山之板劉安千載之後始失
淮州之扁雖緣古今之山靈實由先後之詩聖遂乃
龍探螭攫於一旬之頃溟運川停於九重之間開王
母七寶之函金仙灌手進帝座五色之案玉兔呈毫
擁霞佩而珠冠肩磨快觀會圭郎而壁士口沫爭哦
念美玉與精金元擲地而有韻卽歸真而反質由上

天之無聲蓋謂藏彼星宮不遇槎客者幸耳投諸雲
海肯使禹強而得之失於邑則邑輕在於天則天重
皇天豈宜乎偏重下邑不可使終輕易若腎之乎熒
島之濱乍經太僕之手近之乎江都之府竟歸太史
之營昭琴毀之而卽成楚弓失之而還得鬼沒神出
夫豈人能壁完全投知從天落交州賓館重突兀於
眼前片板雄詞再燠炳於壁裡銀鈎月曲鬼母哭於
秋原寶唾珠圓鮫人泣於夜室何須借記方識滕閣
重修不必浪吟徒勞岳陽三入竒於元化洞天之畫
異於丹書迷郎之蹤嗚呼陳王羅襪之章纔感洛浦

神女軒帝鈞天之樂只驚洞庭魚龍杜元凱之沉碑
寧識字於水底馬長卿之題柱但播名於蜀中執幻
化於一朝終隱見於千里天門水府莫不見而竒之
外國中朝亦有記其異者孤館得詩爲顯荒邑借名
爲高若余者任他造物之呼牛不怨寒翁之失馬無
穀可辟不學仙而若仙無民可治欲爲政而何政新
詩莫就舊疴難醫夷言惱聽猶勝白眼之視高唱堪
和爭似碧紗之籠他日扶搖方驗北極之羽當時霹
靂尚隱南山之陽

送李尚古赴日本序

景稷

蓋隔夷乖蠻陸海由其相錯殊方別域風土所以不
同先王耀而不觀後世寢以相伐是以秦防東北虛
築萬里之城漢通西南遙馳四乘之傳然則皮幣犬
馬之事豈其有他故乎干戈兵革之尋出於不得已
也矧茲日本爲域邈在天下之東其民尚儼其俗習
劍日自平氏之擅國遂有壬辰之被兵雖復賴宗社
之靈旋致克復以神人之憤在所不忘然且不以踰
梁之羞終廢事昆之舉不以圍平之辱終絕款塞之
和是用以帝王待夷之敵爲廟堂御戎之策方見執
贄而修好屬有行人之董成非但理有當然固宜禮

無不答寔選三价以董一行惟公驚超翰筵鳳隄玉
署騁高輪於紫路警咳生珠抗直轡於青雲顧眄飛
電俄霜蹄之暫蹶歛雲翮而低垂又勞驅馳市虎之
疑誰釋猶思韜晦霧豹之斑益彰信乎契丹持疑唯
富弼之可使回紇不測非董晉則莫當肆掄盛名允
協衆望寧承召而竢駕故受命而飲冰非不念浮驟
出疆昔人起懷土之恨戒轄致遠陪臣與去國之悲
而况雙親在堂西岫之暉已迫弱妻去室北印之骸
未寒大丈夫之雄心不出方寸之外小兒女之滿眼
孰無滯芥于中出門遊方猶加定省之念持被入侍

尚有離別之懷矧今絕區之承綸政值溽暑以浮海
然且奉身守分謝易趨危上堂遠離父母不爲戚戚
臨歧相送親舊不爲咨咨豈不以事不辭難乃家庭
之明訓忠唯求孝是力學之初心以孝爲忠忠孝之
至忘家許國國家誰先不遇盤錯之材何以別利器
不遇雪霜之節何以識後凋况念男兒志于四方達
士小其八極章孩捷武未遂窮天之圖夸父神鞭虛
拋逐日之計或有黃河萬里人乘八月之槎蒼水千
年神通一介之使班定遠之衰意願入玉門之關馬
伏波之雄圖終止銅柱之表縱或忘生而循國舉皆

蹈危而黜功何況如孚至誠尚頑苗之有格苟能忠
信縱蠻貊猶可行茲者朝辭魏闕夕宿漢臯終南旣
遐鳥嶺之路千里萊府漸邇馬島之海一葦節屬三
庚陰正伏於地底曾藏萬甲虜已在於目中火燄朱
旗駢闐祝融之宅雷車雨軸盪汨馮夷之宮乘混茫
之區不分渚馬驅濛渺之鳥寧遇海童於是占日候
風迎潮掛席三星離次泛東洋以直馳五雲迷躔瞻
北極而愈邈温池嘔泄之病發必傷竟炎蒸霧露之
氛中輒萎氣蓬窻板屋誰獲偃息之安大厦高樓尚
欲發狂而叫愁馬銜之要路幾處祈龍懼馮隆之奮

推專精賽鬼天輪左轉日月浮而無懸地軸俄窮波
浪積而不載陽侯河伯若遇恍惚之間金闕銀臺如
在縹緲之外或乃怒翻震極天跳大鵬之風噴頰吹
空晝晦長鯨之雨島嶼何時可盡滄海此去無津于
以歷八埏於轉頭責千途以瞬息下碇入境臨館申
辭詩書專對之才遇時得售冰霜凜冽之操敵人皆
驚執玉低昂已著由中之敬舉趾高下自見發外之
誠嗚呼鄭圃隱之高風旣耀前牒黃檜原之清直不
愧古人可並美於一時宜不借於異代豈但無辱乎
君命抑亦有辭乎天朝今余臨行有此一言不見于

今三載炎風驛路送飛軒而莫追明月龜樓望美人
兮何極

送正郎兄赴燕京序

登山臨水昔人所悲去故離親此日可惜世孰無別
人皆有兄叔兮伯兮幸四子之無故顧我復我懷二
人而莫追恩罔極於生成樂莫如乎兄弟可愛非日
難報者天學初賴於薰陶少子何迷技終止於雕篆
壯夫不爲方春暉之入望奄風樹之起慟罪大惡極
死無所辭地拆天崩哭將何及哀遺孤之賀賀尚頑
喘之區區自趨庭之初載心豈或荒苟趾美於先人

死且不朽是以相勉不學而能果終始焉業專逆後
先而名立四人皆成司馬一世所稀三男相繼登龍
九原難作蓋有爲者若是庶無忝於所生方且接屋
連墻園開蔣詡之逕共榻同床堂拂姜肱之衾於是
馬氏門闌起白眉最良之歎江邊父老有紅頰如君
之稱弟勸兄酬莫知老之將至伯吹仲和何憂道其
不行矧自外之名浮劇空中之雲幻彼作宰於南國
猶且疚懷况銜命於中朝曾是不意遂充兩价之副
爲謝貳君之封紫塞極於遼東鶴遺千年之表黃河
接於天上人乘八月之槎鳴江之迴輶幾時燕城之

歸路萬里况今金飈捲暑玉露滋涼葉謝枝寒慈鴉
啼而有血海濶天空斷鴈橫而流哀前山後山十里
之斜陽垂盡今夕何夕一年之明月偏多南浦之歌
愈悲西樓之恨未極相者有淚交手何言嗟呼念載
脂而催程方飲冰而將命箕臺絲管雖慰望鄉之愁
統樓風雲難堪去國之思涉遼灘而冰折度薊野而
雪昏過伯夷之廟則揖萬古之清風瞻望諸之陵則
吊六國之遊士陣雲橫於山海難陟高崗夜兩淒於
玉河空夢春草雖然男兒固有行役丈夫焉念香閨
子長游而文竒季札觀而學博良驥脫韉方起千里

之蹄神鵬鼓浪宜展九霄之翮然後奉勅歸於下國
隨春入於故園回首秦川西嶠函之虛遠携孟漢曲
悅親戚之歡迎鄉廬絕加額之望昆弟有側目之敬
苟無離則何合庶收悲而爲懽不堪遠送之懷遂有
臨歧之贈誌之而已序云乎哉

贈告急使洪樂夫序

命元

冰橫北陸窮陰乘獻歲之期星泛西垣行子起離親
之恨事殊秦庭之哭勢逼魯境之危夫以驕虜憑凌
何代無之朝家羞辱至此極矣雖復張中丞之死戰
出於至誠李少卿之生降歸於賣國何況讎吾父母

尚恐共天而生嗃我君臣敢售他日之計聲言寬奠
陽滋邊上之凝覲覲昌州陰圖城下之恟夷情若彼
誰可奏乎皇扉臣節無他爾宜登夫天路惟其允孚
者貞信所以虛佇乎聖心是知龍韜默符不勞齊牛
之夜觸鳧舄纔舉旋看楚烏之朝飛碣石恒沙無警
一天烟月龍灣鶴野有脚萬里春風

贈吳肅羽赴京序

肅。吳是門人也。

溫綸誕布輝寶典於東偏文駟遙馳朝紫微於北極
方膏蚤轄旋飲夕冰肆我聖朝千載河清大聖人之
既作百揆時序小中華之宜稱微禹其魚拯普溺於

下土就堯如日開大夜於東天蓋茲封誥之邁頒實
賴皇上之睿斷肆廣掄於卿月俾卽催其使星雖爲
謝恩而行亦有辨誣之舉顧周旋應對之責人豈皆
堪選名能文辭之才事乃可濟上公獻薦百僭之望
攸歸副价尤難三舉而後始得一介臣今無他技三
人行而有我師卻殺敦其詩書庶不負學季札習於
禮樂可以觀風暑雨炎雲難掩伏波之節火山湯海
敢緩張淳之行蓋念晉日宵飛馬生郊而莫禦羸天
晝醉鶉與秦而無禁狼戾烽明關城已阻魚門胄落
天路難攀今捨馬而取船理固然矣唯讓夷而涉險

人或危之然且事不辭難安之若命神游八極視滄
溟於一盃誠格重霄者咫尺於九鑰非不念諸僚滿
道違抗轡而連鑣四親在堂曠承顏而悅膝徐元直
之方寸不亂則非情申勃蘇之骨穿至誠之攸發豈
不以許身殉義先國後家無負於天雷霆不懼直心
於物水火難撓紫氣留於關中千文未著黃河接於
天上一帆先懸威鳳鳴雲千仞翔而直下神鵬擊水
六月息而圖南是知長驅薊海橫瘦齊魯碣石近於
階庭安歌澧浦弭節江臯渤澥易於平地妖童怪馬
先期而遁形駭浪狂龍望風而遠迹一瞬千里方探

織女之機孤館三更想洵陽侯之闕舉趾中於高下
愈彰將命之恭執玉合其低昂益殫遵禮之愜有請
卽遂無辨自申丹心荷白日無私皇澤與滄海何極
必從所欲無曰天高逾臻言旋誰謂河廣餘艗遂遠
春動錦還之天蛺蝶飛來花入彩舞之席嗚呼張生
別處擲新詩而有聲桓子歸時把玄文而誰語終違
祖帳猶抱茂陵之疴獨掩柴扉愁寂宋玉之宅

送進香使洪景望赴京序霧

天崩地拆瞻白雲而莫追滿思山哀叫蒼梧其何極
藩壤執薦香之禮陪臣憑去國之輶夫以藉談介而

臨喪應不失對子產聘以博物問無遺論所以江神
送帆吳胥之濤弛怒海若迎棹越裳之波不揚南溟
接於混茫雲遮朱雀之影北極浮於渤澥天霽白鵬
之風斜指臨洮祖龍之長城萬里遙分遼薊丁鶴之
華表千年自信洋中莽杳鳥之一舉誰知天上博望
侯之再來平地起於滄溟長安近於白日嗚呼柳宮
龍動禹穴之雲晨愁綃幕鸞驚堯階之雨夜泣光沉
折木倏千載於烏號暎出扶桑更五雲於鳳闕旣奠
香以申悃乃執玉以控辭北闕凝情非唯寵章之煥
西郊勞駕定知縻秩之崇他日恩波想金莖之一滴

玄洲集
春天病渴回白首於三更

贈登極使韓仲浣序

汝漫

黃河既清聖人應千一之運白日增耀飛龍當九五
之期羣邦馳抃賀之誠率土舉執費之職是用上价
之任必須黃閣之賢專對之才果得黑頭之相俾優
斯禮以重其行所以風伯雨師奔走以聽命江神海
若鼓舞而送颿收無等之壯觀徑不測之遙溢金翎
煮海巨鳥之脛三枝白羽徑天大鵬之背千里溟腰
渤海混沓洩爲鴻濛地軸天輪互表裡如雞郊大氣
之外未知更有何形中州以西豈云了無樂界靈疇

既霽三島之神仙杳嬰風濤不驚萬水之魚龍寂寞
視如平地曾不崇朝碣石南邊蘇武牧羊之澤臨淄
西去宣父辨馬之山槎入星間人歸日下土物以貢
籠玄黃於多方舟車所通執玉帛者萬國龍堆霧廓
山河壯於漢京鳳殿雲開日月低於秦樹千官劔佩
肅鴻臚而低昂萬乘衣冠瞻象輿之起伏虎拜申禮
晴曉呼山之雷龍顏邇嚴羣班揮汗之雨仰如雲而
如日竦爲龍而爲光是知觀海而智益閑見聖而道
愈大皇澤溟運添小邦而綏之主恩山崇縻好爵而
嘉乃嗚呼辭雖至拙拂彩牋而叙情病未臨歧望關

河而銜淚

送李東岳赴潭陽序

安訥

陽關雨歇纔綴贈行之篇南浦春深更洒送君之淚
歧路自然南北人生長是別離惟公懷瓌吐奇弱冠
高步不獨相如之賦飄飄凌雲便覺李白之詩句句
泣鬼二星東照驚紫氣之臨關五馬北旋擁青雲而
浮浴身長八尺古將之風猶存夢破三刀循吏之化
斯在乍矯翼於洪鎮遂超班於萊城丹人畏懷威信
著於日本赤子呼慕惠化留於雲根投簪賦歸非爲
陶潛之菊引領騁望最是仁傑之雲恩尚許其還除

譴方竦於擅棄岳牧攸薦方免尹於愛州廊廟皆稱
旋作伯於潭府栖鸞鳳於枳棘燕雀何知服騏驥以
蓋車駑馬自得才堪王佐誰使士元而居中親老家
貧自喜毛義之補外萱花荆樹隨處春融燕語鸞歌
無非歡緒嗚呼我無爾有生榮死哀顧北堂之已空
哀白日之西匿仰南天而靡及悵寒食之東風奉板
輿而遐征羨君能養負河橋之相送增我離愁東城
之會幾時南國之路千里行穿絲服喜近老人之星
歸掩柴扉恨入王孫之草

送鄭中立序

時

流春東逝共花鳥而含冤飛蓋南飄望駘騎而揮淚
人生此別天路斯艱何況以子之才爲世所棄曾習
飛於鳳穴玉應金春逮聯翺於鴈門簞唱箎和劍三
千之流落天周幾星鵬九萬而扶搖海運無日桃花
開處未躍三級之津柳絮飛時旋懷一郵之印載文
轂於天駟滿路追風耀酒星於老人引盃稱壽他時
春草去留弟兄精神今日斑衣有無父子悲喜嗚呼
西塵乾淨難卜一年二年南馬功名還羨羨十里五里
離魂不散敢作逐車之埃別夢空圓徒驚滿榦之月

鄭公以其子晦
子爲緒故云

贈別竹陰序

結希逸怡叔。自理山移配嶺南。

萋菲仁織貝錦俄成雪霜交飛蘭蕙經瘁猛虎果然
入市慈母所以下機大盜欺天孤臣叩地囚山近於
紫塞風烟異區鬼門接於青羗日月不照關河千里
仁傑望而白雲鄉國三年惠連夢其青草豈料夫暫
移容耐之轍終怪起蟄之雷華表歸來便似遼東之
鶴焚龍遂閉仍悲隴西之禽夢得無辭於大人生返
忍淚退之未見其病妹死別吞聲偷金已還直不疑
之何咎罪人斯得公冶長之猶囚嗚呼蚤嶺浮雲倚
斜日而欲暮龍湖秋水共長天而無言偶然萍水相

逢悲甚河梁之別離
寬脉脉未作逐車之塵
顏色依依那堪滿
梁之月所賴存吾忠
信何往而不可行
勗爾文章無入而不自
得而况聖如天覆物
皆春融羊角天池會
有風鵬之舉魚頭霜
府豈無夜烏之啼惟
願舊竹增陰寒松益
茂江南芳草更喜王
孫之歸堂上斑衣重
看老子之舞

贈別任茂叔序

叔英

紫樓丹宮錯我珠經之句
金瞳鐵髓乍結烟火之因
游戲斯文適來夫子琅玕
芝草忽失雲鳳天麟糞土
蓋車誰識白羲駮駢世皆
養勇北宮黜之不逃士獨

長飢東方朔之欲死反以鑠金之謗終成下石之謀
天閻之高九重難着赤足玉關之路千里何處青牛
纔撥翻於鵬程旋失序於鴈陣兄既窮而弟病道其
不行人皆有而我無哭將何及入脩門其猶邈遇瀟
湘之不期落鳧相同文章何用今朝龜路未共拍肩
之游他日鸞驂應有撫頂之笑

再答茂叔小序

附元序大雨中茂叔書適至
文首句云云

風雨掀天識綵毫之龍翥
雷霆滿空驚寶唾之珠投
異氣氤氳已集造化之迹
祥光焜熒應有鬼神之帝
是知大禹鑄金忘小巫之
舊步巧匠揮斧汗拙劉之

羞顏孔融無才堪御李膺之駕張儀有舌難掉蘇君之時

文兼黼黻窺彩筆而開襟字挾風霜捧華篇而擊節未遊玄圃先看玉石之光不及赤城已賞烟霞之色雖復八音迭奏辨金石之鏗鏘五色相宣識玄黃之照爛士非沈約尚解劉勰之書業謝張紘猶頌陳琳之賦

悼慎佐郎序

海翊

蓋班鸞繡鳳自逸天際之翔玉虬瓊麟肯習地上之步而况哦珠白案未覺一字之訛結胎紅塵非爲三

生之累是知金聲玉潤玲瓏秋水之精蘭茁芝英縹緲春風之面遂乃踰若渚而刷羽躍瑤楸而踈蹄攀斗魁於紫垣光奪八座之曜薦科甲於黃紙祥流五色之雲豈料夫雷動郊亭謫龍還起七日天寒遼表化鶴忽已千年山阻初平之兄白石誰化天留長吉之母玉樓催題嗚呼滄海隔蓬壺萬重明月共瑤臺千里青牛紫氣已出關而莫追碧落黃泉非御風而何極

哀石洲序

權鞞妝章

雄詞振華地控西北之勢麗藻撐碧天起東南之輪

方大雅於偏邦始高蹈於衰俗是知萬類困其凌暴
宜被造化之猜三光爲之弛隲定有真宰之訴故其
詩媒北圉纔吟鼎鑊之雞恨加東籬未歎華亭之鶴
文星晦於天上紫鳳辭錦繡之腸酒肆空於人間赤
虬過廬山之岳廣寒之高九萬颺馭無憑弱水之路
三千星槎詎泛嗚呼人非物是起隣笛於斜陽塞黑
楓青望空樑而落月壯士莫返寒風怒而不休王孫
未歸春草生兮何極

乞畫于海嵩尉走筆序

尹新之

意匠慘憺何勞十日一山元氣淋漓不願滄江驟雨

盤渦淺瀨小鳥困而浴春沙岸蘆洲旅鴻驚而嘶月
春鋤拳足藕折荷枯烏鬼窺魚菰深柳暗爲問探囊
起死何如下筆開生鬼護神藏想玄造於墨迹名高
聲遠瞻碧海與青嵩

上梁文

四首

屢樓上梁文

蓋聞禽居巢獸居穴而攀援之俗迭矣木處顛土處
病而宮室之役興焉邦畿千里則周創制云土階三
等則堯著儉也豈惟人而獨爾雖在物而皆然是以
以蜂蟻之至微亦有衙而有國胡龜蚕之巧智終自

縛而自囚竟梁崩而棟摧吊孤燕之處幕任鳩居而
鷓毀晒維鵠之有巢相彼綏綏終首一丘而死矐茲
翟翟猶陰三窟而生矧我水國逸民海門盛族受命
于河伯與隣乎波臣當龍伯釣鰲之辰縱愁失其故
處逮神禹鎮巫之日終幸奠厥攸居子孫以之衆多
戚黨由是蕃衍敦睦之風則同居過於九世協和之
義則四海爲之一家然而雲雨未興誰識蛟龍之異
靈瑞莫呈等看螺蚌之羣豈可使神徂無庇賢胄雜
處恒隨波而逐沫任宿露而殮風於是咨應龍使治
基誅元龜以米日脩鯨偃鬣而不踊巨鮫縮翮而莫

搏鯨魚伏而息濤商羊遁而逝浪旂常雅雅陽侯集
而助靈旌蠱威威海童奔而執役琴高郭索皆來會
參軍主簿相與謀曰惟彼土木而成之丹青而飾者
歸來宇宙多少樓臺危乎高哉邈天上之十二何其
乂也怪路傍之三年刻桷丹楹旣受譏於魯史山節
藻稅又見誅乎宣尼火三月阿房宮已無及矣歷千
載靈光殿今安在哉班鐫之剗剗王繭之鈎繩幾煩
斧彼而鉅彼豫樟之叅天杞梓之連抱謾勞殷斯而
勤斯袂振斫楣榮樑棟宇之分赴支離任勞筋而苦
骨構樞侏儒椳闔扂楔之經營結構空血指而汗顏

頽垣破墻每逢兵火之慘毒圮桷墜瓦寧免風雨之飄搖野鹿食苗食莘誰識姑蘇臺上春燕飛來飛去難尋王謝堂前舉徒勞而無功儘難得而易失孰若無匠石指顧之煩而神機密運無職方占相之勤而玄猷默成不用晉之垣魏之材楚之梗楠蜀之杉松而衆具畢張不用舜之陶說之築王之朽墁嵇之鍛冶而功庸自足不用犀珠璣貝玉璫璧瑛皓皓黦黦之飾而繁彩溢目不用唯黃白埴錫壁金銀燦燦燁燁之雕而祥光動神何須登登丁丁鬼鬼許許之役而以致潭潭翼翼渠渠巖巖之美也遂乃承浪屋之

帖妥觀海宇之沆瀣侯風光之輒融占天時之鮮麗輕霞飛卷靄初旭之呈輪織雲散收迥穹溟之開眼揚精乎水府構思乎乾端少焉敲嗑靈氛吐結瑞靄無地而起不日而成何樓觀之耽耽若鬼神之縱縱蛛絲游碧落始乍會而乍離貝闕起曾波漸如近而如遠載剗轉頭之頃遂成瞥眼之間吁可畏乎血然駭矣豐壙巨鎮影倒萬丈壯似六鰲戴山彤柱粉礎彩徹九重恍若五龍挾日陋仙人承露之掌跨太液而拂建章象天極閣道之星截清漢而抵營室如橋如梁而士瘦女波非蘇堤抗府之足方若市若城而

馬騎牛牽豈臨淄邯鄲之可擬釣徒騁望而不敢近
恰似秦童採藥而向蓬萊漁郎爭覩而莫輕過還同
漢使乘槎而窺織女琉璃琬琰瑪瑙之寶照爛輝煌
琅玕玳瑁珊瑚之珍糾錯翕習踳跚勃窣而胡人逞
集上楹婀娜旖旎而玉女窺窻下視下王母於玄圃
恍惚瑤池之遊步天子於碧空彷彿銀橋之事眼前
突兀餘百尺渾疑無筆活屏空中樓閣千萬層真是
不眠竒夢海上誰家天下世外更有人間倬蕩蕩無
能名焉非物物刻而雕者鑄須臾之萬象甄造次之
一區造化縮手而傍觀歎事逸而功速天公蹇舌而

降鑑嘉騁巧而幻竒輪焉奘焉功不可尚休矣美矣
德莫與京爰騰燕賀之區區敢資虹梁之業業兒郎
倬拋梁東日出扶桑萬國紅經始靈臺高鼎嵒瑞光
千尺九天通兒郎倬拋梁西雲開霧廓玉繩低丹青
金碧光凌亂影醜龍宮萬瓦齊兒郎倬拋梁南大鵬
飛盡水如藍重城複屋都居壯杳若丹霞映翠嵐兒
郎倬拋梁北風回雨止波濤息有無成毀混茫中百
靈畢出皆辟易兒郎倬拋梁上屈曲脩龍騰滂蕩珠
簾畫棟遠依微海色神光相滉漾兒郎倬拋梁下真
僞旋隨明滅乍形從氣出氣從虛非鬼非神非幻化

伏願上梁之後天無烈風淫雨海絕驚波駭浪登茲
樓望長占無爲之世入此室處永宅何有之鄉

淮陽鄉校上梁文

伏以衛道興化莫不原於學宮揭虔妥靈必先肅其
祠廟今之所以必改作者蓋亦出於不得已焉緬茲
校之始成自亂後而重建雖緣薄乎物力奈難緻其
土功既阨陋莫寧乎聖神又卑側易致其顛仆基傾
水嚙柱礎從以頽歌雨漏風搖梁桷忽焉毀圮瓦解
土崩之患迫在頃刻之間香火釋菜之儀終歸苟簡
之境三間四表之制沉埋鬱沒而無形五聖十哲之

靈眷顧遲疑而不享肆忘寢食而告急庸請狀啓而
構工官無峙糧非不知功鉅而力瑣士有應募亦何
恐道廢而教亡時當作興宜右文而應運民正飢饉
難值屈而舉羸然茲不日之功成豈非格天之誠至
吏徒影附何須民至之子來儒黨風從不煩鬼輸而
神運瑰材占其垣土蔚雲委之如山文石載於飈車
殷雷輾而若岸鈎繩電飛般繭謀而天成畚鍤林竦
呼邪動而谷應夫孰云淮府之將廢窈窕幾吾道之
其興爰際日吉而辰良載資虹梁之龍舉兒郎偉拋
梁東日映蓬萊千萬峰從此先師先聖廟愁山千載

血穹崇兒郎偉拋梁西月生滄海玉繩低從茲棟宇
神扶敞悠久斯文天與齊兒郎偉拋梁南隆薨反宇
齋眈眈春秋俎豆明裡意昭格祥雲覆霽憲兒郎偉
拋梁北遙挹白頭靈岫色彬彬儒術日蕃昌生子生
孫勸方冊兒郎偉拋梁上崔峯觚稜斗間嚮圓冠方
領揔螟蛉鼓篋家家事涵泳兒郎偉拋梁下燕雀羣
飛賀大厦自此蓮城蔚士林烽軍撥卒何爲者伏願
上梁之後休徵眈嚮景福紆餘人人誦法聖賢豈惟
家鄒而戶魯歲歲皆歸豐稔將見錢朽而粟腐

月巖祠宇上梁文

伏以弘演出使不以狂衛而移忠伯夷登山豈有聖
周之貶德所以式間封墓實帝王之弘規尚德祀賢
乃鄉邑之善範是知胥山餘俗猶傳伍員之祠介里
遺墟尚開子推之廟豈可使千萬古無前之偉節三
百年不薦其馨香徒彷彿而欽崇任潛埋而沉滅凡
國家興亡之際非乏烈士忠臣蓋死生去就之高孰
與我公爲伍緬惟天必生才而有用公之銜命也非
時鄭公孫之出疆才稱專對吳季子之去國心懷隱
憂聘禮急於奔星衆拱皆北歸心劇於流水萬折必
東竣事方還俶裝言邁逮夫皇城西屬燕薊之路千

重故國東望鴨江之水一帶今日還非昨日他鄉猶
勝故鄉飛龍適升昌期正當九五化鶴將返華表忽
已三千日月無私雖不阻於前路山河有異又何懷
乎故都僕夫懷余馬悲豈還鄉之無意宗社遷市朝
變將返命而誰承於是尺素寄星辭悲而義壯寸丹
炳日馬歸而鞍空解袍脫靴志家人之偕葬回袂旋
踵作華疆之偏氓遂以裁書送奴之辰乃爲捐館別
世之日逢萌之赴遼海事異而跡非秦伯之如荆蠻
途殊而轍並嗚呼周春長薇孰謂殷家之草宋雨生
豆何處晉代之田歷觀諸賢馳聲而騁烈罕聞一士

高蹈於別區脫世超塵任雲月之獨舉他山絕壑昧
霜松之自枯公之聞孫非不世貴而代顯墓而不記
終使迹泯而聲沉一家秘而失傳雖出於述志舉世
無以考德將歸於滅名鄉俗稱之而不隆理幾乎熄
州家置之而莫報責誰其任惟彼晉代之糜傅彤不
以敵國而有間周王之獎梅伯不以前朝而有殊矧
我國家代崇旌門增秩之舉苟有聞奏絕無片忠寸
義之遺韓邑邊劔牧老之祀不墜延州香火圃翁之
享猶崇賴此正氣之綿綿閱三韓千百代忍使至德
而泯泯迄二百七十年是用入府停輶卽搜遺訪潛

是急出郊抗轡以承風沂流爲先趨瑩展禮而殫誠
揭實摛文而垂淚嘗念佯狂元聖猶許白馬之朝隱
冶孤忠終老金烏之巷楓林楚水想秋鶴而與飛烟
月巴山愴春鶻之哀叫殉忠蹈節寧忘父母之鄉越
海踰山應費歸來之夢方思狀聞而表德要以揭虔
而妥靈幸賴前監司崔公現以一鄉衛道之宗儒有
千載血祀之雅意以其宿契於心者遂與後昆而謀
之茲神宇創開之基乃先生舊遊之地籠巖石老香
白雲而千秋洛水波深洒清風於六合松陰迴拂所
平日之盤桓桑陌遙連是先代之間井茲乃無勸無

率而役隸畢集不車不鞭而木石咸具萬杵舉而雷
騰千鍾樹而林列功告不日役豈踰年兒郎偉拋梁
東日照飛虹映洛東遺址一朝開棟宇英靈千載奠
吾東兒郎偉拋梁西天起脩龍指洛西即看風馬雲
輿住休望荆門郢樹西兒郎偉拋梁南吾道于今正
在南芬苾薦來儒化遠賓興非但嶺之南兒郎偉拋
梁北竟去無東西與北彬彬多士景仰之不啻高名
斗南北兒郎偉拋梁上飛薨迥出雲霄上鯁生誠意
與天通他日香烟一縷上兒郎偉拋梁下祥墩如雲
蒸日下先生至德無間然放之可見彌天下伏願上

梁之後儒風日淑文化川馳戶孝家忠愈新禮義之俗山枯海渴無廢俎豆之儀

鳳笙精舍上梁文

夫以天慳爽塏星文舍少微之精地秘神臯富媪掩大靈之兆是知香山尋石樓之築人知白司馬之養真武夷覽精舍之興帝賚朱晦翁之修道所以輞川烟雨之畫只貽林慚浣花草堂之居猶帶浪迹今余一行作吏三歲治民爰居爰處者是邦靡室靡家以度日淵明三逕之宅尚未言歸文舉五十之年忽焉已至敬亭山下幾吟謝眺之詩天姥峰前空穿靈運

之屐未遂松雲之栖息難醫泉石之膏盲蒐遊剡溪烟霞足遍會稽山水當時白雪雖寡和其何傷是處青山喜爰得其所蓋休官投老以後皆採山釣水之年人實廷予誰云風月之無主天其或者必待吾人而有成玉髻瑤簪幻做象外真界金峰鐵壁恰作人間活屏綵雲徘徊如聆鳳笙之漸近錦浪澄澈况瞰龍氣之微凝兔棧鳩嶠杳霞連而霧壁姑城魚岫互月暈而蓮開山鬼密若無言天神果然有意乃使行人過客常往來而不知樵夫漁郎置尋常而勿論胡然副其至願乃能誘其下衷所以柳相國之先知

人或泥止鄭愚伏之指示神其告歟於是不量功鉅
而力穢乃克消吉而構役幸賴士友之廣助伊致木
石之咸臻爰誅宋玉之茅寔開蔣詡之逕壞材既舉
是謂有志者事成翬翼將飛佇者不日而功訖爰騰
燕賀載贊虹梁兒郎偉拋梁東日照姑蘇古堞紅高
棟倚雲明水國唾珠時復落龍宮兒郎偉拋梁西山
店溪橋返照低茶竈日長無客到幾畚幽興好詩題
兒郎偉拋梁南魚鱖霞光釀暮嵐岸草巖花山寂寂
詩僧去後靜無談兒郎偉拋梁北田父驅牛向東陌
從今不聞吏夜呼禾黍滿郊民自足郎兒偉拋梁上

村閭接屋兒孫長內無勃谿有敬恭社酒時携禮相
讓兒郎偉拋梁下不必渠渠成大厦且足冠婚之所
於還宜燕雀區區賀伏願上梁之後興祥致福除厯
蠲灾清風不盡明月無邊誰爭林下富貴琴瑟盈床
圖書滿架不羨世間功名

致語 三首

擬周穆王瑤池王母宴致語

八虬凝 翱翔物外警蹕五雲含彩邂逅天上神仙
金盃萬壽流霞瑤池一面風日仙凡合席 同歡
恭惟王母不老長春有生無死丹穴九苞鳳白日騎

行玄圃一角麟碧空牽出尋經紫黃案上吹簫白玉
樓中滄海三千年靜看桃花開落廣寒九萬里閑弄
桂影婆娑唯知步虛飛昇孰云戴勝穴處麟洲掇草
滿袖瑤香鶴岑捫蘿繞襟紫氣栖息三清世界升降
九天炤霞朝賜谷暮金樞鞭撻日月躡璇虬乘玉馱
挾御風雲茲者偶隨閭闔門來遙自崑崙山至曉來
鳴霞佩飛過三山晝下翻雲旂長揖萬乘聊將一宴
消息惹起萬古依稀羅襪纔移羞澁洛浦仙女鈞天
乍奏起舞洞庭魚龍今予自是塵蹤賴有仙分將皆
有車轍馬迹雖遍河山愧獨無綺語瓊詞以娛左右

擬七月七日織女別牽牛致語

風馳鳳驛巾霧縠以俶裝月側魚肩振霞裙而將御
仙愁玉蘊靈涕珠懸夫以鴛夢春圓迷玉度之日怠
雷威夕赫觸金憲於雲官遂謫南北如參商誤恩天
地而父母機寒繡幕龍幾化於玉梭草暖瓊沙牛不
辨於銀渚蘭悲蕙然與桃李而無言兔泣蟾啼伴姮
娥而有淚編三百六十之日暇以一朝越九萬八千
之天會于七夕屬當佳期之聿屆每怯良匹之我先
驅彩鸞於紫虛虹鞭繞霄役靈鵲於清漢羅襪凌波
欲往從之天路奚憚夫險澁亦旣覲止伊人爰在乎

中央嗚呼簪合鈿分春風無賴於頃刻山哀浦思歡
意卽歸於微茫靈雨慙慙鳥飛而履散香塵寂寞鳳
去而臺空

擬織女別張謇致語

金堤鵲散臨渡頭而無橋銀浦魚驚遵漢濱之有客
天旄吠月飄繡衣於星灣玉鷁凌風掛靈槎於斗渚
若云黃河在地那得白日昇天怪人蹤之此遐擲龍
梭而爰語碧落千門萬戶卽羣仙焉是鄉玉京十樓
五城乃上帝之攸宅今余絨恨莫白理絲爲紅獸錦
成時坐終七衰之日牛郎別後虛度萬古之春茲將

一片堅頑聊表九天消息風塵此去休說贈石之人
簾肆他年宜尋賣卜之士

帖二首

毛都督前領議政回帖 文龍

天斗回杓青陽代玄英之節藩樞聳色琮玦來玉帳
之函承德音而知榮戴休烈而何極威聲震夏名動
草木之風兵氣橫秋血腥魚龍之海方當獻歲之頌
忽紆如春之恩隆禮殊私一出於誠意齊竒蜀玩五
彩而雲烟茲揭罔謝之衷仰輸不腆之物今朝蓬島
霑厚恩於仙家他日燕然誦洪伐於石刻

毛都督前李尚吉獻帖
山將壓外方震疊於凶巢技止雕垂詎形容其偉績
然銘心之匪石故發口者是碑仰惟精忠百年一劍
四海便宜責大裴晉州之臨戎上將官尊孫叔敖之
出塞人猶鎮蜀名動雪山事異征蠻功高銅柱兵氣
衝於南斗天地低昂陣雲結於東洋龍虎變化返髦
倪而棄侵地師以益張察噉呻而壞機牙敵不敢動
不惟金復海蓋賴以得蘇抑我昌義龜龍恃而無恐
中朝下國獨任無限之功北漠西陲誰敵莫當之勇
塵殘楚壘方瞻飛幕之烏春入遼天定有歸巢之鶴

肆藻繪於短軸敢榆揚其壯圖伏念始得馭於府治
旋獲私於儼接當時漢樹疇爭不伐之功今日周棠
愧無勿翦之詠

教八首

教忠清監司洪慶臣書

王若曰咨牧十二寔虞代之臻治分陝東西乃周家
之共理肆我邦之有八路若王制之建諸侯所以難
其人莫不重此任矧茲百濟之舊域實乃一國之要
衝控海引湖地方幾六百里連都對郭邑居餘四十
區商通漕轉與三界共之轂擊肩磨走兩南道也非

惟物衆而地大伊又士殷而兵彊及今日最稱瘡痍
由頃年累經兵火丹人逼於魏野首尾幾危赤子弄
於潢池腹背受害厥後連歲動衆雖因詔使之行以
至彌載輿徃無非宮闕之役民幾疲於奔命吏又緣
而作奸蘇殘復枯百無一計重困累瘁十有六年非
但牧守之非人或慮詢宣之失責惟卿夙以文行長
自儒家學問淵源自負碩德重望容姿端毅世比美
玉精金盛之銀臺玉堂久賴論思出納歷以學宮諫
院每嘉匡救薰陶惟其量才所周是以無職不辦斯
採朝右之師錫輒庸勞外而獨賢厥位惟艱非卿莫

可茲授鄉忠清道觀察使秉繡鉞於玄闔官是使星
之尊下玉節於青冥秩居卿月之亞卿其往欽職事
來報政成用汝倚爲干城予以作之屏翰知卿文雅
有素不宜經幄之暫虛哀我蒼生何辜姑以拯濟爲
先務觀察豈徒於風俗勸課不外於農桑豪舉疲瘵
豈剗恤之或後贓污廉清在黜陟之所先興學校而
明倫乃所能者整軍伍而繕甲亦且勉之至大辟唯
可稟裁自通訓任其獨斷於戲褰帷原隰勿憚載馳
之勞攬轡澄清克副若保之望故茲教示想宜知悉

教黃海監司尹瑄書

王若曰分符秉鉞統牧守而總治從漢迄今威節鎮
以爲重先王莫不是慎茲予所以疇咨矧我青丘以
東得此黃海爲本遙濱巨浸舟楫之所能通直走皇
京冠蓋之所相望影魚蓋銅鐵之利俗阜民殷依山
谿險阻之形物衆地大風聲足以感發首陽之遺名
在茲義氣足以勸懲延城之死守如昨以江淮之保
障當國家之咽喉比緣年歲之凶荒又添詔使之絡
繹民無產者八九吏作奸猶尋常以剝割爲己能未
如何耳以黜貶爲何事誰之過歟旣懇且懃非教條
之失實彼來此代每因循而及瓜茲擢近列以特除

庸冀希世之躋績惟卿抱負國器生長相門德星聚
奎有是子於是父荆花滿樹信難弟而難兄許身經
業乃家所業洽聞殫見不學而能惟其早占巍科所
以歷敷華秩文經武緯將相之才旣兼東塞西邊威
惠之效斯著然今海西之缺帥適當朝右之擇賢念
茲銓衡之擬掄實出岳牧之咸薦從時望也寧有加
於此乎以予觀之固無愈於卿者奉命出納灼知喉
舌之當先任國藩屏姑以干城而爲急茲授卿黃海
觀察使耀使星而北控爵比元侯瞰卿月而西臨班
猶亞保卿其往欽職事來報政成暫虛銀臺雖欠一

人之啓沃終奠海邑可蘇庶氓之瘡痍卿以出入爲
殊塗予所後先者一體而况芙蓉城裏實行殿之所
淹蔽帝崇陰乃先臣之攸憇遺澤尚洽理宜懷綏寄
惠未亡治可趾美顧惟觀風察俗豈徒勸農勤桑斥
汚崇清是其責也尊儒尚學亦且勉旃急貸民力於
耕耘益俟賊情於風汛如違約律在都邑其何饒苟
失師機縱兵營猶可聞

缺

教密陽府使元裕男論書

王若曰繕器峙糧旣蘇創殘之邑嘉勞血勤詎惜超
加之糜茲增一階庸勸羣品惟卿智孚於勇惠濟其

威自初拔身所在職判監後臨敵果以勲陞由歷試
之無幾非建功之不大屬分符於茲鎮方責效於將
來惟其壤接要衝所以賊成巢穴豈徒死亡之殆盡
抑又凋瘵之難治全嶺以南無非彼賊所躡大亂之
後每以此府爲憂幸今方帥之糜能乃據守宰之顯
實如他邑者易理孰茲土之可完穀阜財殷旣足一
年之蓄兵精劍利克壯三軍之猷邊圉不驚誰非李
緄之力保障無缺實賴尹鐸所寬撫字之誠孔勒備
備之才已著賞斯副於衆望予何愛乎一頌報功是
圖登秩非濫體三錫之命益殫精忠作萬里之城以

衛疆場

教慶興府使閔洞加資書

蘇殘蓄銳是邊圉之良猷記績酬能乃朝家之令典
寔陞爾秩庸嘉乃勞惟爾武而猶文寬能濟猛由其
愷悌曾試臨民之官重是邊壇乃副體府之薦矧慶
興之為鎮介朔野以為衝經亂以來日凋月耗自爾
之往吏畏民安以俘而返者逾四十名變夷而進者
迨百餘戶城池既已深固兵甲無不利堅昔之毀壘
孤墉今為巨防雄府徒聞渤海之化出於治繩得要
誰識晉陽之完實以損戶為務肆據閫帥之廢狀聿

加通政之特資於戲藏弊禱而待功所以勸也作長
城而衛國爾其勉之

教

閔汝儉書

王若曰忘身循國雖臣子所當為記績酬勞乃朝家
之令典茲欲勉其後效用仍陞乎特階惟爾自宰是
邦益殫素志移城守凍無安土重遷之珉繕器防秋
有賈勇願戰之士以折其分小之義為協心濟艱之
基臨機慮危躬擐甲冑之屢月據險守要手撫瘡痍
者判年穿弊緼而却繒吏有泣其一寒御疎糲而忘
肉民不甘乎再食矧今興師之六載雖是北邊之良

亥洲集
苟得如爾者數人庶弭西顧之念肆起爾秩允嘉乃
誠嗚呼予無愛乎嘖笑汝宜竭其股肱損繭絲於晉
陽猶能保趙操版鍤於卽墨無怪全齊

教靖社功臣洪瑞鳳書

王若曰地轉天旋幸際風雲之會山盟海誓聿加茅
土之封酬何稱勞賞不侔伐惟卿忠貞傳世文雅承
家詞華所宜歷顯要而增彩冰玉其操處昏亂而愈
彰自兇徒煽禍之初已無宦意逮母儀囚幽之後堪
與世違惟其透義之深故能炳幾而作况神民舉國
之怨咸萃一人肆祖宗在天之靈默佑寡德忠憤所

激不謀而同黃泉入盟天乎是可忍也白水起義需
然孰能禦之然擇中於文謨豈徒上其武烈撥亂而
後反正非乏猛士之鷹揚應天所以順人實賴君子
之豹變果然兵刃之不血仁暨義而並行遂致慈闈
之未寧情與禮而備至念此丕基之重廓莫非嘉猷
之密成爾縱不言瞻大樹而猶蔚予何以報奉盤血
而徒慚茲舉策籙之儀庸示糜顯之典於戲英姿雅
表畫麒麟而不如倬績精忠垂竹帛而無愧

教靖社功臣柳舜翼書

王若曰相機任權乃處變之長策察效疏爵是酬勞

之弘規廢非溢名顯惟實蹟惟卿確礪身操敦樹家
聲惟忠憤正激于中此其時也雖亂賊近出於族彼
焉逸哉敷貞信而壞機牙賴潛消其逆節吐愷悌而
止奸毒竟莫犯乎慈闈扶綱於人所不知行義於國
之將覆况當義旗之一舉已有倒戈而齊迎所共戴
者毋儀實慮驚動乎中闈由豫申其將令乃能直宿
於分曹肆於商郊杖黃之辰果得周旋建白之力炳
幾而伐其兇計外患絕於不虞先事而達于中官內
情恃而無恐惟其持被入省差欠汗馬之勞終乃開
門出宣實管上宮之事于以靖亂勢有坐作之分及

其成功事無彼此之異斯揭策錄之典聿示糜美之
章優井食而裕昆備物采而榮已於戲今朝瞻相對
麒麟而念茲他日渝盟質山河之在彼

教寧社功臣許禱書

王若曰先事侯情幸罪人之斯得論功定次莫與汝
而爭能茲加封爵之榮適彰糜嘉之典惟卿家承闕
閱世篤忠貞詞藻文華乃其餘事風神骨格果然異
常事蹇身伸來五窮於韓愈名高宦帶老三世之馮
唐守郵於兩道之間任他乾沒無命於百僭之底罷
官歸休惟食息不忘乎君故尋常所憂者國當大憝

煽覓凡之日已嘿察其嘖呻逮羣渠濟惡之秋乃潛偵其動息非不知發謀而告慝蓋所慮匿情而變辭是用闖然傍觀任其自恣乃於舉事之際先期豫圖卽以逞凶之謀飛書上變夫以聞隣國之有逆尚且沐浴而請誅覩叛賊之無君敢緩奔走而告急惟其疾病之嬰體故使心腹而兼程密通勳盟壞機牙於未動急捕魁倘網垂蟻其何逃衷甲入門者虱伏而就縛稱兵抵漢者魚駭而爭遁元兇伏辜街漲鯨鯢之血餘倘受戮肉餒鴟鴞之腸苟非卿忠國已危矣致有今日誰之力耶以曲突徙薪之功豈居焦爛之下

肆發蹤指示之績宜在逐殺之先賁期思之就封勳存第一蕭鄧侯之食邑誰謂獨多斯疏爵而貴之用分茅而嘉乃於戲有臣於此爲國乎何泰山黃河帶礪之盟猶在雲臺烱閣圖畫之意可忘

批答 一首

右議政三度呈辭不允答

王若曰言固不再旣申申其勉敷辭何至三若蹙蹙而靡騁卿胡遽爾予甚缺然惟卿以社稷臣有休戚義大旱霖雨豈獨借於商賢今代麒麟任無限之唐烈惟其展風雲之志所以拓經綸之圖將相之才方

且倚其出入清慎之操奚但質之神明况國事之艱
危已至此極伊兇徒之反側有難形言卿其可歸休
乎予亦未如何耳矧爲言之胡得究其意則不然苟
以堯堯爲可嫌恐妨休休之容量當此汲汲危疑之
際欲以區區細故而辭似非卿之本心將置予於何
地皋陶之於唐帝自許股肱臣蕭相之於漢高不啻
左右手忍使中流而失涉任他欲濟而無舟深惟厥
由罔知攸屈將必昨疾之今愈庶見道泰而時康亟
匹共貞之休毋果獨善之計於戲方臨濬谷捨巖廊
而疇依若構明堂思棟樑之畢舉宜報勿藥之有喜

庸副如渴之至誠

箋
五首

擬館學儒生請以五賢從祀文廟箋

在明德新民方一人之有慶欲崇儒重道捨五賢而
其誰肆當作興之辰敢陳從祀之請恭惟服纘禹舊
命維周新喪必致哀旣篤奉先之孝祭則受福詎列
非鬼之祠第惟五臣之繼興實在累朝而迭作下學
上達發羣賢未發之思繼往開來傳千載不傳之緒
道所存者文不在乎天之何爲使斯人而莫遇時哉
不可故其道之難行在用舍而行藏無所失也使君

臣而父子誰之功歟茲有配聖廟之論肇自先哲王之久蓋出於尊師之至意非強爲聖世之虛文方且舉行其儀副士林之輿望誰意遷延之際哭鼎湖之龍髯端由國事之未遑非以廟享爲不足矧當嗣服之始通弘培養之基王化豈宜尋常文教必自振作如欲衛道之本莫若從祀爲先或祀或否於先正固無損益以尊以敬在後學其敢虛徐伏望尊德而象賢繼志以述事春秋釋菜俾三老五更而揭虔金石絲簧配一聖十哲而齊饗則自今以後吾道其東朝野絕章奏之勤生徒有依歸之樂謹當摳衣攀化鼓

篋趨方溫故知新雖愧鳥數飛之學從師學道庶遂魚千里之心

代賀上尊號牋

德居功先旣躋嘉運之泰實包名外聿覩徽號之尊雖舊維新在古誰亢恭惟轉亂爲治用晦而明北極遙臨終格拱辰之義東溟迴響永戢橫海之鱗宜騰顯稱合彰洪伐伏念職縻司甸迹阻趨班維翰維屏縱愧甘棠之詠以蹈以舞敢後嵩山之呼

代賀誕日牋

誕膺吉夢祥協電繞於星聿值佳辰慶屬陽生之月

真呈一葉松獻萬年恭惟大勳光宗茂祉延世丹人
根德終銷日母之氛紫極輪誠欽承天子之命肆見
長春之節適當太平之期伏念職忝司畿迹阻詣闕
治亂一部縱愧金鑑之箴壽富多男願效華封之祝

代賀登極箴

謳歌已歸方頌改玉之慶綸誥忽降聿覩錫圭之榮
喜溢宗祊歡洽疆場恭惟則天爲度如日之昇撫南
功弘收心於數千里潛東孝著延頸者十七年茲承
丕基寔受休命伏念職忝司甸迹阻趨班黃河既清
幸際飛龍之運白首未死徒切如岡之呼

代賀中殿箴

克配乾綱夙著幽閑之德欽承天命載膺中正之儀
齊喜春融羣呼雷動恭惟咏葛著儉脫簪爲規媯汭
告和實賴閨箴之助監撫底績豈無內範之成肆刑
于家宜母於國伏念遙違班筍忝司畿崇才劣觀風
縱愧藩屏之責化致綏福冀贊樛木之詩

玄洲集卷之十

玄洲集卷之十一

併儼續 十九首

制

擬漢高祖拜韓信為大將制

乙巳之下

庭試上

專征戎閩惟是興滅之機杖鉞師垣必須英俊之器

所以今虛斯位古難其人夢感風沙既勤祝天之請

卜協羆虎竟得坐茅之師皆明醮廟之誠以嚴推轂

之禮矧予初起馬上先入關中當解縛而送徒知百

萬之心異逮如廁而從間賴一二之臣同屬慄悍之

妄專介巖邑而屈迹既擅宰以四海又隔我以三秦

疇能輔予方蹙蹙而靡騁誠得賢士寧鬱鬱而久居
惟其乏敵愾之才是以無用武之地頃緣失左右手
終幸得爪牙臣有國無之非若入而誰與殆天授也
豈丞相之誤耶事與爾諧謀非獨斷惟卿有才無命
舍智若愚如窮人無所歸屈屠中之衆辱哀丈夫不
能食德城下之一簞茲仗劍而間行勞躡躡而遠戾
官初止於都尉是誠何心位不過於郎僭彼猶可戒
如諸將者易得吾何與於日亡在國士而無雙爾宜
陟於元帥肆齋心而肅潔卜吉日而辰良委以分閫
之儀重以設壇之拜於戲從其古道倘賴定秦之謀

會于榮陽何難馘楚之舉誠願與子偕作終始二人
共貞勉盡良圖以樹偉勳

表

擬唐翰林學士武平一謝加賜一枝綵花表
賞呈七葉斗移柄而寅迴花挿雙枝首至地而震懾
臣何昧於止足花亦羞其上頭伏念技薄虫雕分踰
駑錦哦月露風雲之句寧黼黻于皇猷吐區哇啁折
之音未笙鏞乎大雅猥被一二臣之謬薦忝廁十八
士之華磚迹近雛枚雖待馬門之詔才非劉應難工
兔園之詞忽值綵勝之佳辰初收詞掖之華藻都俞

玄洲集
堂陛竊效賡哉之歌咫尺威顏未免率爾而對言志而已賦詩云乎纔成一字之難愧蔑驚人之句顧乏寸班之彩實非動主之文捕虎近於失頭疇稱下士之勇畫蛇勞於著足徒以至拙爲工方竢罰籌於法筵堪被鑄削於藝苑何圖十行之屢批更兼一朶之竒花翠桂九秋之芬微浥月宮飛露紫桃千載之萼淺濕日谷流霞萬戶千門難買片房之艷三清十界詎觀一鬢之芳天上人間絕無而僅有仙曹羽客疑夢而非真天其可欺人必不信有何先鳴於數子乃令加挿其一枝左顧右盼而愈驚手舞足蹈而益惕

鰲戴三山之重比臣頭則猶輕佛頂百寶之蓮駭人視而何貴他皆一半春色獨專十分天香伏遇如日如雲日暘日雨聖人之建大德都是體灑灑天草木之遇陽春無非活潑潑地至今愚臣之雙髮亦開縻美之兩花敢不隨枝向榮戴花傾晷辰當人勝縱愧勝人之詩運際河清庶撰清河之頌

擬晉姚馥謝拜酒泉太守表

地若不愛郡胡稱以酒泉天誘其衷分實泰於太守薰骨是澤浹肌如春伏念宜號渴羗合誌醉死使酒難近縱承命於朝家不醉無歸方待罪於廐園何特

除之殊渥及至陋之微臣顧茲郡之得名唯以泉而
爲貴流之混混水何取斯飲卽陶陶我自樂此有何
爵勸之績終獲飲名之鄉伏遇愛之欲生醉之以酒
敢不沉三百六旬之飲長祝聖人勝二十九日之醒
庶不廢事

擬宋范質謝拜同平章事表

亡國敗家本不以圖存爲念赦過宥罪又從以爵賞
之榮喪君得君無父有父伏念爲人無狀事君不忠
當焚香祝帝之辰雖知天意之有屬逮陳橋易袍之
日無奈人心之已歸安用彼相爲哉唯願有早死而已

縱犬馬誠有所激伊倉卒言不知裁方茲鈇鉞之嚴
誅以答天地之深怒斬丁公於興漢實所甘心釋伊
吾而相齊曾是不意何圖爰立之異寵特及當坐之
纍臣感極叩胷驚定拭淚有何可赦之事承此不次
之恩國亡獨生不義於其君可驗臣事二主欲忠於
他日實難苟嵇象刑之加豈爲人臣之戒况一朝以
白馬猶有議於殷仁彼五登於黃扉孰不耻乎馮道
數窘帝以祿賞非所可方一斬裾而登庸亦何足擬
伏遇大德受命至公無私雖在物中之微猶恐不獲
豈以天下之大以私其讐遂令礎頭之老僇得比股

肱之元宰敢不惡不念舊化與維新苟活偷生雖作
忘君之隸改心革面願爲聖人之氓

擬秦朝羣臣賀平六國定天下表

五過三兼功德適超於今古六畢四一車書幸覩乎
混并胥衆均歡率普同慶竊惟古昔帝王之創業實
由祖宗積累而肇基白魚登舟天與教孺之弘績玄
鳥墮郊人歸及禽之至仁矧寶系出聖帝之門姓顯
於唐虞之際伊異爵著姬周之代功存於汧渭之間
犬戎摧鋒地始闢於千里鶉首呈瑞天還醉於一盃
以漸東隣非自今耳乃眷西顧厥有舊哉欽惟堯步

舜趨文謨武烈深仁體天厚德體地伐罪吊民猛將
如雲謀士如林戰勝攻取黃金白璧無計六雞之連
蒼籙玄符終歸七雄之長從分約解雷攻三晉之莫
強北絕西生電掃全齊之無敵終然一匹夫不若徒
爾六千乘奚爲紛羊質而虎皮孰雞口而牛後大梁
之廝徒奮擊亦無柰何上黨之龍淵太阿寧有可恃
榆長袂而躡利屣來趙女於咸陽振霧鬣而披風駘
嘶代馬於渭水收士鍊兵精之楚秋封橘柚之園藉
肩磨轂擊之齊春稅魚蓋之海地不載其六國天專
付以一家函谷風雲百神效靈於雄虎瀉池雷雨萬

水委波於祖龍卞鐔烟收飛九重之玉璽軒戈火烈
立十二之金人抵營室而截銀河抗千尋之高棟起
臨洮而延碣石橫萬里之長城若非蓋世威靈寧啗
伏乎九宇必有齊天武德能服綏此萬方肆一出大
聖人爲萬古始皇帝唯其博也厚也高也明也所以
手之舞之足之蹈之伏念臣等俱以庸才幸當盛際
攀鱗附翼雖茂汗馬之勞資日模天徒切如陵之祝
擬宋翰林學士歐陽脩等進獻唐史表

弭彤木天方慚舊聞之失漬墨芸閣敢進新撰之書
俯綴陳編仰塵淵鑑竊惟華國之手必須作史之才
狐筆稱良旣誅篡弑之賊麟圖鑑遠宜懼亂賊之徒
從古草創之成賴東里之潤色所以石室之記聳西
漢之文章才固其難任莫此重欽惟博審究學勤勵
廣心訪隆咨於翠籤每日具而惓惓吊興亡於黃卷
或夜分而孜孜然此唐乘之乖訛出自劉煦之誦薄
辭不達意失一字之貶褒議無格言昧百王之取捨
斯豈述之而不作縱能言之而無徵於焉拔擢於詞
林庸令校讎於天祿詎如臣之可肩曾有德之所辭
分霜兔於月宮空玉皇之香案降雪牋於星漢匝蓬
菜之綵雲爰撫仙李之春秋載輪汗竹之鈇鉞安民

濟世唾禁門之血腥牝雞司晨痛房州之帝在螭碑
既建雪晴鵝鴨之池雉表纔焚花落馬嵬之驛黃門
飛鞚想廳事之石榴朱氏窮凶悲紇干之山雀歷稽
得失於治亂實由進退其賢邪當房杜之協資始貞
觀之化洽逮姚宋之繼罷漸開元之政衰蜜口劒心
養禍孽於鼎鬲鬼色藍面吹毒螫於縉紳纔止二十
帝而亡未滿三百年之享自始及末雖作六七之賢
有初無終舉皆二三其德遠賢亡國如影隨人敗迹
興機咸筆筆而削削前言徃行幾君君與臣臣斯就
一秩之書以資九重之覽小子何述大略如斯伏念

學不通方愚未聞道丹鉛事點謾傷眼前之古今白
首窮經久勞皮裡之涇渭飽貽尸素之刺謬擅汗墨
之場何圖縫掖之微蹤承此竄緝之重責惟誅奸發
德之法縱有愧於謹嚴伊錄善記過之詞或無遺於
虛實倘於執經之暇兼致讀史之功實撰實修寧自
怵於天禍以勸以戒將有裨於聖治

序

臨鏡堂序

吳家庄後周浦村前因池爲堂臨鏡其額繞長洲而
作帶開大野以爲襟名區占郊鄙之衝雄鎮檀湖嶺

之春橋橫烏鵲地分廣寒之靈城峻蛟龍俗仍帶方
之舊瓊材間出幾箇英豪之倫巨室相望隨處樓臺
之好撫龍頭而北控送鶉子而南奔地絡壯而天王
高星象逼而老人近披嘉樹之蒼蔚爽籟自留枕老
石之盤陀纖塵不動行雲斷雨粧黑城之春陰返照
橫烟媚白坪之暮色樓臺倒影若泛魚龍之宮方丈
入簾未覺神仙之遠觀水有術如鏡未塵彼自行於
地中吾何坐於天上芳酒登而溪女醉寶瑟御而游
鱗聽磨光不磷照心莫逆有時清月之出嶺短棹孤
舟以沂流昏往晨來無非清致春生秋殺皆是勝觀

矧我主人公不學勝儒無吝居富旣積能散名已愧
於倘來守拙爲工計不失於長往嘗念跳丸莫駐逝
波無還天路險而難攀人生止於行樂花枯竹折瞻
依旣已爲墟雨泣雲淒未思閔其無主斯夜秉以燈
燭方日掃其庭除然而右軍未逢空茂林而脩竹子
安已去杳秋水之長天羣公畢題豈欠詞於岳壁複
語固請斯借記於素城今余萬事違心一行作吏傷
時痛哭異窮途之步兵暇日登臨似離家之王粲晴
川芳草雖慚崔顥之詩長笛倚樓不讓趙嘏之句姑
將一言而贈遠慰千里之思今朝郡齋強作序者妄

耳他年風景更爲公而賦之

霽月亭序

破高霞而飛棟地隔紅塵披爽籟而凭欄天開碧玉
物影相况風光自留何況魚躍鳶飛春屏繡活虹銷
雨霽秋鏡霜磨火傘無賴於炎蒸冰江有似乎銀漢
回舟唱恨沙院杳而行斡落鴈流哀廣陵寒而烟樹
俯仰雙輪霽月高深一色長天天上如今未知幾多
風景人間何處更有第一江山惟彼岳陽之樓最高
洞庭七澤蓬島之路虛遠弱水三千顧一到之無期
縱三入其誰識江湖果然有玉風月所以無邊今日

吟清已比道人之臆他霄宵吐應驚塵匣之開

伴鷗亭序

仙留地上天入壺中秋陰共白波無邊衰草與黃雲
何極瓊洲耀碧亭連白鷗之沙錦石粧紅人送赤壁
之笛歸帆帶月潮盡洛河之腰落鴈驚霜寒生長浦
之口雪夜呈其銀漢如泛星槎冰江近於玉京何處
月殿桃花在他流水蓬島自有烟霞勝賞如神詩得
句而有助浮榮等幻雲出岫而無心今夕飛筇再訪
萃陽之隱他時吟袂三入洞庭之樓

月波亭序

滄波萬頃作清漢而穩流明月孤輪轉碧雲而終古
亭胡此額予忖他心夫以玉兔離于桑巔黃金乍躍
銀盤掛於斗柄素練橫吹高非廣庭望銀河而透極
迥異遐漢驚白海之浮空奚但龍伯澄龜靈凝珠貝
之闕仙翁爽骨清澈水精之簾所以雨侯晴光難以
悉舉花辰雪景置而勿論嗚呼不見江湖之勝區半
生已過欲知主人之襟袍一上茲樓

追送九畹序

李春元

世啓昌辰河應千年之運天回聖曆人乘八月之槎
驚鳥舉翔斷鴈留影何況水潦浮於薊野車箱入波

火雲接於秦城口眼生土大夫跋涉非唯三伏之炎
虜騎憑凌正值四郊之壘亦非可畏之甚抑有所疑
者存神戈旣揮吾屬庶無虞矣寶筭方富此言奚爲
至哉復土存亡不生我而父母還魂肉骨難報德於
乾坤嗚呼鄉國重迎有來日之不遠陽關此去無故
人其何傷唯願皇極清秋瞻五雲而舊色龍騰白雪
返雙轂而新恩

成小序
追寄之

既友索麗序頗勤兩余以仕忙未遑
究於拜辭日有溫語即於直中走

贈鶴谷序

洪瑞鳳揮世

蓋聞驥登雲路或蹶千里之蹄鵬舉風霄必待六月

之息雖復垂耳伏櫪猶懷逐電之才褰噉潛溟益厲
擊水之翰而况重登龍榜獨擅兩甲之名累掌鸞書
皆稱三世之業孟母果有孟子早賴類遷虎父豈無
虎兒終成異彩弱冠高步蜚英騁譽頃值姻婭之違
殃乍戢羽毛而屈迹蹇驢破帽誰識薇垣之仙紫貂
金蠟曾是鑿坡之客茲者家兄作宰縱遂便養之誠
慈聞入望唯以曠省爲念回錦翼於鳥嶺快觀爭先
落文星於酒泉驚傳恐後方融洩之未洽胡聚散之
旋催余嘗望道如雲從風觀海今朝贈語自慚槍榆
之飛他日追塵應憐附尾之翅

送李子剛序

蓋安貧至樂非萬鍾之所移殉道初心豈三軍之可
奪所貴乎士有如是夫今子雅操厲於冰霜經世有
志高論摧其山岳質神無疑席業承家名已著於少
日摘詞振華人或稱其父風聞道有先相見何晚春
衣未搜已弊洛陽之裘雲路難憑堪失塞上之馬花
洲絲管纔成傾蓋之歡清榭琴樽旋催分袂之淚恨
如芳草何歇愁共落花無邊嗟乎滄波白鷗何處更
有樂地青山明月到底無非故鄉龜鶴亭前莫歎歸
途之遠鳳凰山下宜尋終老之盟

臨別走贈吳從事序 蘇

躡青雲之要路弱冠超騰收白水之真人少年幕府
靈飈挾掖泛瀛洲之層波浩氣盈襟濕方丈之彩霞
飛步湖山幾重領略風月無邊度仙鑣於竹峰夢寐
不到展芝眉於榮館驚喜何言絲管樓臺_制電之歡
未洽街途騶騎揜裾之淚旋催明月丹丘如成再遊
之計秋風白首唯思匹馬之尋

答李司書為人婚禮乞衣啓序

餘春碎錦對落花而銷意過雨跳珠驚寶唾之入手
生龍起牘晴電掣絨方且簪芸閣之彩筆玉立青雲

啣講肆之飄香錦還白日烏反哺而聲樂鴈失序而
流哀適因婚媾有言果見麗藻無敵誰復楊柳春旗
之句獨稱瘦信平生關河秋色之詞無出張衡秀氣
然既天心月脅深究造化之源雷厲風飛非特鬼神
之泣是以有譽於我至屈華篇豈曰無衣於人重孤
盛德顧念以童習白紵之學得黃絹幼婦之辭衣以
致言衣德言而無斃食而忘味食肉味而不知

除夜走筆序

東陽吝臘咬生菜而知春北杓回寅飲屠蘇而惜日
乘除半夜新舊二年禹陰去而不留孔川逝其何極

雖日日而引繩難繫飛駝當夜夜而秉燭况值茲辰
呂尚父之八旬倏爾將迫孔文舉之五十忽焉已臻
雖然八千歲以爲春是亦有限三萬日而定壽固無
不宜矧今弟兄連床方會千里之面姪孫盈室共做
一宵之歡相與迎新何歎功名之暮樂而卒歲休嫌
樽酒之多

疏

代薛道人化緣疏

倏先朝露何心白頭人間無限春風長夢紫霞洞裡
爰念飛昇白日不必服食丹砂玉液金津轉作虎騰

龍躍瑤箏鐵笛將看鳳舞鸞翔自是夜中存非從天
外得清千尺之慾浪運一團之純陽三入岳陽樓世
人那知來往一上蓬萊殿神仙方覺有無路迷萬壑
千峰桃花不分真境雲橫十洲三島明月何處瑤臺
心潛玉樞口哦斗訣起身此日唯思壺裡乾坤技宅
他年敢望雲中雞犬是所願也他何足云

箋

大妃殿上尊號後大殿賀箋

癸亥八月

革舊維新屬濟屯之亨運奉慈以孝舉獻號之徽章
喜溢臣工慶關宗社恭惟 殿下履端兢業養志怡

愉日馭初昇快覩彝倫之正坤綱再肅
詠雪幽宮之寃肆冊貢其顯稱允協副于輿願伏念臣等俱以庸品幸際昌辰斗戾山摧仰母儀以不匱鳧趨虎拜祝聖壽之無疆

正朝百官賀箋

巳巳正月

逢時建寅知盛德之在木如日當午慶至化之無垠歡均幅員喜溢朝野恭惟師堯則大體舜用中銅渾運衡叶龜壽而齊政玉管移律遵鳳曆以調元肆與物而皆春庸順序而行夏伏念臣等俱以駑質濫紆鴻私瞻望紫宸愧蔑絲毫之補蹈舞丹陛徒切崗陵

之呼

上梁文

金僉知祠宇上梁文

享祀不忒既篤追遠之誠寢成孔安寧弛奉先之敬禮依先立功告重新竊惟祠宇之肇修以長恩愛於後裔左昭右穆而不懈蘋藻之薦春烝秋嘗而益惕霜露之濡葬以士祭以大夫克殫事亡之禮薦其食陳其宗器詎射如在之儀功有百代之不遷德至五世而皆斬歷稽元宋以上咸建正寢之東是知堂非斷椽而其靜足以妥靈豚不掩豆而其敬足以受福

戰戰兢兢之色發齋明盛服之時肅肅洋洋之容著
煮蒿悽愴之際所以潔其牲酒庶幾保我子孫頃緣
戎馬之生郊未免竄身於荒谷造次顛沛於是雖勞
載木主行飢寒困頓之際未遑抱祭器走杳杳南國
何處先人之弊廬纍纍北印每度無家之寒食乾坤
百戰春燕回而無巢華表千年遼鶴歸而有恨寢倚
纔安於墻壁洒掃未遑於阼階宅無餘於人亡山猶
在於國破雖令妻子好合敢曰爾有室家旣無風雨
攸除所以神不顧享恒偏側而阨陋應眷顧而遲疑
以至六七年者非但一二計焉一以財用之不贍一

以亂離之未定肆靈宇未克經營俾神位久致飄零
神無所依何殊豺獮之薦親不待養空悲烏鳥之情
茲者邊息數警之烽田騰屢豐之頌斯董不日之役
以安在天之靈富媪產祥地呈龍虎之勢夸娥孕秀
山走鳳龜之形如切如嗟何必東海之石是斷是度
不待南山之松彫柱粉礎之工蔑以加矣雲輿風馬
之迹若或見之爰騰贊音載賀梁舉兒郎偉拋梁東
日出東隅瑞靄紅滄海萬里龍起立九溟魚鼈荷神
功兒郎偉拋梁西斡捐榮桷自相齊有子若孫能幹
壘青冥隨意上雲梯兒郎偉拋梁南飲澗晴虹映翠

嵐馨香明德神欽嗅受祚曾孫獻酌三兒郎偉拋梁
北垣土宏材開敞赫高我門閭容我車我稼如雲我
野闢兒郎偉拋梁上屬茲至治臻無象積善之家餘
慶存不騫不崩齊天壤兒郎偉拋梁下如鳥斯跂如
鳳翥無疆之壽無疆休垂裕降嘏千秋也伏願上梁
之後休徵疊著嘉祥遄臻呵禁門神與戶靈勿使興
妖而作怪昭假祖考薦昭靈於四時永保雲仍綏福
祿於萬葉

教

完平府院君李元翼賜几杖教書

卿今老矣豈合趨走於朝予欲安之斯有几杖之錫
端由至敬實非虛文惟卿幼學壯行兩朝一節孝悌
忠信以爲本源清直廉平乃其餘事凡所踐歷無不
辨治再巡宣於箕都民望如草終體察於湖嶺人安
若山逖矣西土之人曰父母只果然南國之化自周
召焉伸於恢復之初屈於革除之世受誣流竄垂一
十岭罹危辛苦又千萬狀惟其樹立之愈確不以夷
險而易操幸今天與而人歸叨此丕業如欲國安而
道泰盍收賢叱肆於撥反之初先以登崇爲急江湖
蓬萆連北闕之青雲城市巖廊反東山之赤舄黎元

玄州集
憂喜何待察眉而知白首歸來允副加額之望爰虛
首揆之席實荷股肱之良凡有謀猷罔不予告事無
大小悉以國從何意君實之纔還遽告石碣之乃老
方精神氣臆之尚壯豈筋力耳目之或衰茲將供老
之資以爲取便之具赤藤堪把雖非西極之遺烏皮
穩憑肯羨南郭之隱寔置孔光之座用給蕭何之扶
嗚呼國方倚卿宜倚几而治國卿實扶國可扶杖而
安卿故茲教示想宜知悉

帖

謝毛都督致賀 冊封

玄符東降紆聖澤而方漸紫氣西來開寶函而益惕
寵榮斯極感鏤何言仰惟大人德在威先文隨武濟
方飛仁而揚義奚但草木之知名且旋乾而轉坤已
有山河之動色弊邦之尚皆按堵亦公之恩凶賊之
不敢仰關果誰之力况今封誥之遍布雖荷聖鑑之
孔昭乃令讒說而未消寔賴敷奏之以實致有今日
莫非公誠至勤物備而辭精尤見情隆而禮洽誠願
與子偕作捍王于艱燠虜穴而覆虜巢縱愧胤侯之
征羿助天聲而共天討庶效桓公之攘夷

